

西域水道記卷四

巴勒喀什淖爾所受水

巴勒喀什淖爾者伊犁河所瀦也伊犁河二源西南源為特克斯河

特克斯河出汗騰格里山

準語謂君為汗謂天為騰格里猶言天山也

在納喇特嶺西五百

里山脈來自木素爾嶺山勢尊嚴羣峯環拱為天山之主峯特克斯河

出其北麓

水道提綱云特克斯河出根克多貝格根地之大山東麓西三十四度極四十三度六分

準語謂野山羊

為特克謂眾多為斯言濱河多此也河三支並出會流逕特克斯塞沁

小卡倫西

卡倫西北距沙喇雅斯卡倫六十里

又北折而東逕垓爾汗山南五十里多木

達都

多木達都與多木達同多木達見前

哈布哈克水入之多木達都哈布哈克水二源

並發南山北流經多木達都哈布哈克小卡倫東又北流匯特克斯河

特克斯河東流五十里伊克

蒙古語伊克大也見元史語解

哈布哈克水入之伊克哈

西域水道記卷四

布哈克水發南山

伊克哈布哈克水一源多木達都哈布哈克水二源故又統名古爾班哈布哈克水

北流經伊

克哈布哈克小卡倫西又北流匯特克斯河特克斯河又東流二十里

烏爾克沁布拉克水入之烏爾克沁小泉也東北流匯於河特克斯河

又東流五十里喀喇河入之喀喇河發南山西北流經納林哈勒哈

蒙古

語納林細流也

小卡倫北又西北流四十里經察察

準語察察小廟也以貯殘廢佛像者

小卡倫

東西距伊克哈布哈克小卡倫五十里

東北流一水自東南來共匯於河特克斯河又東

流阿爾雜木素爾水入之阿爾雜木素爾水發南山冰嶺之陰也北流

匯於河特克斯河又東流格登水

格登本山名準語格登腦後骨高之象山形拱起如腦骨然故名水復以

山為

號也自北來入之格登水二源西源發達布遜淖爾南岸山曰阿爾班

水

蒙古語謂十數為阿爾班特克斯河北岸入河之水凡十自東數至西終於是水故以為第十水也

南流數十里經上

三旗厄魯特之喇嘛寺西厄魯特者準噶爾種人也其左翼為上三旗



初準部台吉達什達瓦

小策零敦多布之子

為其汗喇嘛達爾扎所殺

喇嘛達爾扎者策妄

多爾濟那木扎勒庶兄也弒策妄多爾濟那木扎勒而自立

其屬來歸編置熱河乾隆二十九年遷

伊犁是為左翼厄魯特牧於特克斯河及察林河岸其喇嘛寺在格登

山北麓阿爾班水經寺西又東南流匯於格登水格登水西距阿爾班

水五里源發格登山即水之東源也

格登山在惠遠城西南五百餘里北距格根河源八十餘里

昔

大軍之追擒達瓦齊也達瓦齊自特克斯河竄據格登山二十年五月

丙午定邊左副將軍阿睦爾撒納奏言臣等於五月五日渡伊犁河據

散秩大臣阿巴噶斯等言伊於達瓦齊未到之前先赴華諾輝

今作霍諾海

保護游牧達瓦齊遂自格登移駐尚圖斯臣等領兵於初十日至華諾

輝圖西里

準語西里山間平甸也

見有賊人蹤跡隨兩路進兵迨至哈新烏蘇身

親察勘則達瓦齊擁眾將及萬人後負格登山崖前臨泥淖駐營固守

西域水道記卷四

正在相度間有自達瓦齊營來投誠者二人曰莽漢曰們都自言係明

阿特鄂拓克之人在特穆爾圖淖爾

蒙古語特穆爾謂鐵也

游牧近為達瓦齊所

脅達瓦齊自特穆爾圖淖爾帶兵來此住歇未必即有歸降之意然眾

心離散別無可調之兵臣等竊思達瓦齊氣衰力竭斷難持久若竟領

兵掩殺既非仰體拯救準噶爾眾生塗炭至意即投誠人等亦不無因

此遲疑却顧臣等詳察地利於十四日兩軍各據形勝整陣以待並示

欲掠游牧之勢以誘達瓦齊是夜派翼領喀喇巴圖魯阿玉錫厄魯特

章京巴圖濟爾噶爾並新降宰桑察哈什帶兵二十二人往探而阿玉

錫等突入賊營出其不意放鎗納喊賊眾驚潰達瓦齊率二十餘人竄

去北黎明獲其台吉二十人宰桑四人宰桑之子弟二十五人及達瓦

齊親隨兵五百餘人又所調兵四千餘人收達瓦齊妻孥及所居大蒙

古包一礮六仍令參贊大臣公達爾黨阿追躡六月丙寅定北將軍班公第奏言達爾黨阿至庫魯克嶺達瓦齊已入布魯特境嶺外有通回城及布魯特路令侍衛台吉等曉諭之越二日戊辰又奏言是月八日達瓦齊行至喀什噶爾界圖爾瑪阿奇木伯克霍集斯遣其弟攜酒馬迎勞伏兵林內擒之並獲其子羅卜托宰桑愛爾齊等七十人令副都統額爾登額等以索倫兵三百人喀爾喀兵二百人於十四日往木素爾受其獻迨定伊犁立方碑格登山巔四面分勒滿漢書回部書唐古忒書以銘功焉

高宗純皇帝聖製勒銘格登山碑曰格登之崔鬼賊固其壘我師堂堂其固自摧格登之巖薛賊營其

穴我師洸洸其營若綴師行如流度伊犁川粵有前導為我具船渡河八日遂抵格登面掉背巖藉一昏冥日擣厥虛曰殲厥旅豈不易易將韜我武將韜我武詎曰養寇日有後謀大功近就彼眾我臣已有成辭火炎崑岡懼乖皇慈三巴圖魯二十二卒夜斫賊營萬眾股栗人各一心孰為汝守汝頑不靈尚竄以走汝竄以走誰其納之縛獻軍門追悔其遲於恒有言曰殺甯宥受俘赦之光我擴度漢置都護唐拜將軍費

西域水道記卷四

三

賂勞眾弗服弗臣既臣斯恩既服斯義勒銘格登永詔億世二十五年伊犁辦事大臣阿公桂疏以

格登為伊犁鎮山歲祀著為令

文曰惟神位正金方勢崇西極鎮準噶爾之全部夙著靈奇導岡底斯之羣峯丕宣氣化職方未載乃應運而服懷柔王會成圖早報功而行刊旅從龍在望報饗宜虔朕綏定遐荒削平大漠負陰抱陽之類莫不尊親出雲降雨之司咸同覆載惟格登山之雄峙環伊犁河以高騫地險爰標神功攸懋在奪壘擒生之日助王旅以宣威值崖紀績之辰翼天庥而効順作屏遠服載揚赫濯聲靈考制名山用展殿縣典物謹先期而諏吉俾時享而薦馨康我邊陲永秩春秋之祀表茲絕域式垂山海之經雉譯咸通鴻圖常固聿將芬

東南與阿爾班水滙復東南滙於河特克斯河又東噶克察哈爾海水

入之水發冰嶺之陰懸流噴激並山東流至噶克察哈爾海軍臺西南瀦為池北經軍臺曲折流山中九十里至天橋山徑中斷下臨不測編木為棧伊犁與阿克蘇所分界也水經其下又十里至沙圖阿瑞軍臺西余乙亥歲除宿於茲臺臺倚水側隔岸葱鬱谷口東眺遠見格登雪

氣不寒檉樺萌茁瓊廬燭炮殘杯不乾濶聲淙淙胡歌四面歲暮崢嶸
泣數行下異鄉之悲至斯已極水流經沙圖阿璊軍臺北數十步達山
外又北流七十里匯於河特克斯河又東二十里逕特克斯軍臺北河
寬數里奔溜湍急渚激瀾漫駕鷺鵠鳴於焉卵育乾隆二十八年參贊
大臣伊公勒圖始置巴圖蒙柯至沙圖阿璊七軍臺以特克斯河水深
闊造成呼二剗木為舟狀濟人國語名曰威呼令索倫部人善操舟者二人教習之卽
此臺渡口也特克斯河又東數里喀喇烏蘇自北來入之喀喇烏蘇者
努爾圖水琿博圖水哈爾罕圖阿璊水圖爾袞布拉克水四流所匯也
渡格登水五里得努爾圖水又東二十里得琿博圖水琿博圖水西數
里有小水發北
山東南匯又東三十里得哈爾罕圖阿璊水又東八里得圖爾袞布拉克
水水皆發自伊犁河南岸山東南流努爾圖水琿博圖水皆匯於哈

西域水道記卷四

四二

爾罕圖阿璊水三水鍾為葦蕩又東南匯於圖爾袞布拉克水復南流
達山外是為喀喇烏蘇復東南流匯於河特克斯河又東十里哈升水
自北來入之哈升水發於哈升嶺在惠遠城西
南二百里重岡複嶂高六十餘里

水發其陽南流經博羅哈瑪爾山諺曰青
石梁又東南匯於河特克斯河又

東二十里沙喇諾海水蒙古語諾
海犬也自北來入之哈升水東十里得烏蘭

布拉克水又東十里得沙喇諾海水沙喇諾海水發自沙喇諾海嶺南

流至博羅哈瑪爾北烏蘭布拉克水自西北來匯同流經博羅哈瑪爾

東又東南入特克斯河特克斯河又東五里月爾圖水自北來入之又

東五里巴噶準語巴
噶小也哈爾罕圖水自北來入之又東三里伊克哈爾罕

圖水自北來入之皆發自沙喇諾海嶺迤東山伊克哈爾罕圖水經舊

銅廠東南流嘉慶十四年將軍松公筠誘誅寧陝叛兵王文龍百數十

人於伊克哈爾罕圖卽此水所經也伊克哈爾罕圖水東三里爲塔塔爾虎布拉克水又東八里爲巴拜布拉克水亦發自沙喇諾海嶺迤東山塔塔爾虎布拉克水東南流滙於巴拜布拉克水巴拜布拉克水同南流入於河特克斯河又東北二十里伊克華諾輝水入之巴拜布拉克水東二十里爲伊克華諾輝水又東五里爲巴噶華諾輝水二水皆發自華諾輝嶺山與和濟格爾相直乾隆二十三年定邊將軍兆公惠奏言於華諾輝山口對面之和濟格爾收取杜爾把集賽得木齊伊什博什等六十八口是也伊克華諾輝水南流經銅廠西伊犁銅廠創立於乾隆四十一年先是四十年將軍伊公勒圖建言於伊犁置寶伊局鼓鑄制錢每文重一錢二分幕文曰寶伊用銅八分四釐鉛三分四釐八毫錫一釐二毫歲鑄錢千一百餘貫自烏什喀什噶爾哈喇沙爾每

西域水道記卷四

五

城運所產銅次年於哈爾罕圖山

諺曰鳳皇山在惠遠城南四百五十里

置廠歲採銅六

千觔所謂舊銅廠也五十六年將軍保公寧以曠竭移廠哈什歲增採

銅千觔益鑄錢六百貫嘉慶六年又自哈什移於巴彥岱呼巴海

蒙古語巴

彥岱謂富者呼巴海山無草木也諺名曰三道溝

卽伊克華諾輝水所經也華諾輝水又西南

流由華諾輝谷中行谷長五六里怪石對峙杉松蒼翠嚴寒行役乘馬

踏冰水流冰下聲益澎湃有小鳥如燕翱翔冰上名曰冰雀亦曰雪燕

鷖乳冰窟亦雪蛆冰蠶之儔矣水至谷外西南流二十餘里經華諾輝

軍臺西

距特克斯軍臺一百里

巴噶華諾輝水自東來滙共南流至胡都爾海入

特克斯河特克斯河又東北流華托羅海水入之華托羅海者泉水也

經阿勒坦和碩山西又南入於河特克斯河又東北流察罕烏蘇入之

察罕烏蘇發自冰嶺東山北流滙於河特克斯河又東北流阿圭雅斯

水入之阿圭雅斯水發自阿圭雅斯山乾隆二十二年定邊將軍成袞
扎布奏言臣等自裕勒都斯起程策應明瑞七月初二日明瑞越高嶺
數處行兩晝夜至布昆哈瑪爾間知綽和爾等渡庫克烏蘇糾合昂吉
岱等盤踞阿圭雅斯山中伏賊於密林以待因遣兵截去路賊見兵勢
卽跳追至葉克特里克嶺賊依山結寨石峯林立冰雪堆積馬乏難行
不能奪取暫於明布拉克同語明千數名也地泉多故名駐劄是知阿圭雅斯所源故
林箐阻深矣水東北流滙於河特克斯河又東北流古爾班吉里木台
水入之又東北流古爾班莫列台水入之又東北流古爾班特勒克水
入之乾隆二十五年副都統豐訥亨追瑪哈沁往圖爾根河準語圖爾根迅急之
謂遇賊擊敗窮追兩晝夜知賊在伊克特勒克河源藏匿往阿圭雅斯
打牲因分三路往迎卽三特勒克之一也諸水皆發自阿勒坦和碩嶺

西域水道記卷四

六

北流入於河乾隆二十四年護軍統領努三奏云阿勒坦和碩嶺在木
素爾額林哈畢爾噶兩山梁之間夏令尚有積雪是也特克斯河又東
北流温都布拉克水入之蒙古語温都直也温都布拉克水在巴噶華諾輝水

東三十許里又東流三十餘里雪爾圖水自北來滙又東三十餘里塔
爾巴札圖水自北來滙又東四十里經博爾軍臺南距華諾輝軍臺一百里博爾

水自北來滙博爾水發自博爾山伊克博爾巴噶博爾兩山相比地有
回民屯田引博爾水溉之温都布拉克水又東五十里莎水發自莎嶺
來滙嶺在惠遠城東南二百十五里嶺產鐵乾隆三十八年將軍舒公赫德疏言伊犁

種田回民銷買舊鐵製作耕具數年以來收買殆盡於伊犁河南莎嶺
開礦調阿克蘇城回民三十戶試採迄今山陰置廠焉廠北二十里爲

莎郭勒軍臺距博爾軍臺八十里自軍臺南行二十許里踰嶺嶺高二十許里余

曾登陟嵯峨有馬瘖之歎水至山陽南流滙温都布拉克水温都布拉
克水又東八十里玉季坤水自北來滙玉季坤水發自莎嶺迤東山南
流經沙畢納爾之喇嘛寺西沙畢納爾部舊與土爾扈特同牧俄羅斯
之額濟勒河乾隆三十六年以八百六十七人隨土爾扈特來歸編附
厄魯特下五旗其人惟習黃教徭役不及也水經其寺復南流滙温都
布拉克水温克布拉克水又東三十里巴哈拉克水自北來滙巴哈拉
克水亦發自莎嶺迤東山南流經厄魯特下五旗之喇嘛寺西下五旗
者右翼也準部遺衆之就撫者編置華諾輝空格斯河喀什河岸游牧
因建寺於此水經其寺復南流滙温都布拉克水温都布拉克水折而
南傍阿勒坦和碩山東入特克斯河特克斯河又東北逕特里莫圖嶺
南又東北流庫克烏蘇入之庫克烏蘇發自南山陰北流古爾班吉爾

西域水道記卷四

七

瑪台水

蒙古語吉爾瑪小魚也

自東來滙吉爾瑪台水發自南山陰西北流一水

自南來滙又西北流一水亦自南來滙三水皆曰吉爾瑪台故有古爾
班之目庫克烏蘇又東北流哈畢斯朗水自東來滙吉爾瑪台與哈畢
斯朗皆流經達哈岱烏拉山西南以滙庫克烏蘇乾隆二十三年追瑪
里格爾巴朗副都統由屯與奎蘇德在格登托羅海追拏三月二十七
日參領都倫保與錐寬等從特克斯河下游至庫克烏蘇哈喇博和齊
嶺追及賊人三十日莫托和爾等從特克斯河上游追賊見二十餘人
從華諾輝嶺旁行盡剿殺之是其地也庫克烏蘇北流入特克斯河特
克斯河逕達哈岱烏拉山北有莫霍爾濟爾噶朗水

國語謂盡頭處為莫霍爾發

自南山陰西北流西滙哈爾罕圖水來入特克斯河又東北流伊克濟
爾噶朗水自東來入伊克濟爾噶朗水發自東南境山西北流多木達

濟爾噶朗水自南來滙乾隆二十五年侍衛碩通等至多木達濟爾噶朗搜剿賊衆收獲馬匹卽此水也伊克濟爾噶朗又西北流察罕布拉克水自東來滙又西北流入於特克斯河昔雅爾哈善之縱賊庫車也兆公惠實代之奏言臣於古爾班濟爾噶朗途次得信九月九日起程卽此三濟爾噶朗矣凡山中斥堠所曰塔布圖在莫霍爾濟爾噶朗源者曰博托木塔布圖其東北十里曰垓拉巴特塔布圖爲多木達濟爾噶朗源又東十里曰拜布拉克塔布圖爲伊克濟爾噶朗源又東十里曰綽羅圖塔布圖爲察罕布拉克源又東北七十里則昌曼河北岸有昌曼卡倫焉濟爾噶朗河干置船廠每歲伐南山木修作糧艘沿於濟爾噶朗達於特克斯河河逕莫紐庫尊嶺東烏蘭布罕西里山西凡六十餘里至河口空格斯河自東南來滙特克斯河凡行九百餘里

西域水道記卷四

八

東南源爲空格斯河

空格斯河源出哈喇沙爾西北境鄂敦庫爾嶺

一作額通古里卽音之轉

西麓其東

麓有溫泉石瓮尙存故老言是準部遺跡使準噶爾行程記云自阿拉癸山口至空格斯河源凡九日程阿拉癸山口西行四百七十里至大裕勒都斯又六十里至鄂敦庫爾山口正月二十日自鄂敦庫爾山東口起程踰鄂敦庫爾嶺五十里入西邊山口兩岸松林稠密中間流水潺湲瘴氣漸清山水秀麗如畫惟遇雨雪坡滑難行二十一日順空格斯河在岡口內行六十里岫頂松林澤湄柳樹時聞鶯聲二十二日八十里宿鄂敦庫爾山西口二十四日六十里宿空格斯河是河行百餘里出鄂敦庫爾山也源處極四十三度三十一分西三十二度五十八分強空格斯河西流霍爾海河自東北來入霍爾海河發自鄂敦庫爾

嶺北山西流百餘里察罕烏蘇來滙察罕烏蘇發自阿爾察圖山

蒙古語謂

有松柏枝見元史語解 乾隆二十二年副都統由屯擒扎那噶爾布七月初一日

行至喀什河

河出玉故與和闐玉河同名

獲尼瑪屬人俾為嚮導次日黎明到喀什

河之阿爾察圖山口分兩翼圍游牧賊潰蓋山之北即喀什河也察罕

烏蘇西流滙古爾班伯爾克河以滙霍爾海河擒扎那噶爾布之歲吞

圖布及鄂哲特竄在古爾班伯爾克河額駙色布騰巴爾珠爾襲之獲

鄂哲特之妻霍爾海河折而西南入空格斯河又西北流逕

伯爾克阿璊小卡倫南又西北流五十里逕納喇特卡倫北又西北流

四十里逕烏努古特卡倫北有烏里雅蘇水自北來入之空格斯河又

西北流博克什罕河自北來入之

博克什罕河東有納林河西南流滙博克什罕河

又西北流

札那斯台水自北來入之又西北流圖爾根河自北來入之阿爾察圖

西域水道記卷四

之役克勒特人聞大兵踰納喇特嶺遁至喀什八月初八日由屯追至

圖爾根河遇賊力戰謂此河也空格斯河又西北流逕察爾圖嶺南其

嶺有泉自北來入之又西北流拜牲圖水自南來入之又西北逕哲克

圖嶺南其嶺水自北來入之又西北流昌曼河自南來會昌曼河發自

納喇特嶺數泉噴湧聚而成川其地多鹿諺名鹿圈後漢書郡國志廣

陵郡東陽劉昭云縣多麋引博物志云十百為羣掘食艸根其處成泥

名曰麋暖斯之鹿圈蓋其疇歟昌曼河西北流經昌曼卡倫南又西北

流經達哈特嶺北滙其嶺水又西北流經喀喇淖爾嶺北滙其嶺水又

西北流經烏蘭嶺北滙其嶺水又西北流達山外入於空格斯河空格

斯河又西流逕特穆爾里克嶺南其嶺水自北來入之特穆爾里克嶺

巨空格斯喀什兩河間段氏若鷹說陘字義云兩川之間必有山焉是

爲坎象坎者陷也高在下間爲陷故一山在兩川間者曰山絕坎又謂之陁特穆爾里克嶺正陁之謂矣嶺陽之水入空格斯嶺陰水入哈什兩河自原及委山徑可通車布登札布傳云阿睦爾撒納竄死逸賊阿巴噶斯等未就獲車布登札布奏遣兵赴哈什空格斯搜逸賊蓋林莽重複足爲逋逃淵藪空格斯河又西北流逕衮佐特哈北伊犁之再定也定邊將軍成衮扎布領兵由裕勒都斯駐衮佐特哈辦理克勒特與烏魯特游牧事卽其地衮佐特哈水溉厄魯特田北流遇沙而伏空格斯河又西北流逕胡吉爾台北胡吉爾蒙古語謂峭也地有三泉皆北流遇沙而伏嘉慶十七年正月二十有五日時加戌亥伊犁地震衮佐特哈胡吉爾台山裂四處長二十里至六十里寬五六釐深十餘丈至二十丈又於平地湧出高阜其土虛浮踐之卽陷臨風搖動數十日乃止死者厄

西域水道記卷四

十

魯特人四十七流人十一官牧牲畜二千五百九十五隻厄魯特牲畜千七百餘隻卽空格斯河南岸也空格斯河又西北流至烏蘭庫圖勒嶺南與特克斯河會凡行六百餘里伊犁鎮川也乾隆二十八年入祀典春秋祀之文曰惟神洪源遠布遐澤旁敷潤西域之神皋灌輸攸賴隸北庭之都護耕牧稱繁巨嶺東來束岡巒之蜿蜒大河西折作襟帶於伊犁環沙漠以揚流効地靈而播德含滋有應令典聿昭朕撫卹羣蕃削平諸部百靈効順張雷動之六師庶彙咸昌與雲屯之千耦惟茲巨川之利濟實爲神爽所式憑在昔飲馬長流澄波旣慶卽今洗兵濛汜渥澤均沾特詔祠官載隆望祀屆春秋而將享丕昭漸被之麻練時日以潔蠲克集懷柔之福承茲永秩式此居歆

二水合流是爲伊犁河

二水會處極四十三度四十五分西三十四度二十分河亘伊犁南北之中伊犁北境漢匈奴地南境烏孫地漢書西域傳烏孫國治赤谷城東至都護治所千七百二十一里地莽平多雨寒山多松櫛不田作種

樹隨畜逐水草與匈奴同俗東與匈奴西北與康居西與大宛南與城郭諸國相接本塞種也又曰温宿國北至烏孫赤谷六百一十里按今

阿克蘇爲古温宿自阿克蘇城北至伊犁沙圖山口已六百六十五里

可知烏孫北境不踰特克斯河矣

漢烏孫境全在天山之陽自捐毒之北迄於焉耆之北而温宿焉耆北山

之陰當仍有屬烏孫者

陳湯傳云郅支侵陵烏孫大宛如得此二國北擊伊列西

取安息謂得烏孫乃可擊伊列是又伊列自爲一國在烏孫北之證舊

唐書突厥傳或作伊列或作伊麗列麗之與犁蓋音轉輕重故大學士

傅公恒進西域圖志表云伊犁實伊麗之流是也西突厥咄陸可汗立

與啞利失可汗大戰因中分自伊列已西屬咄陸已東屬啞利失啞利

失死其弟仰那之子沙鉢羅葉護可汗建庭睢

新書作睢

合水北東以伊列

河爲界顯慶二年閏正月庚戌以左屯衛將軍蘇定方爲伊麗道行軍

西域水道記卷四

七

總管帥燕然都護任雅相副都護蕭嗣業發回紇等兵自北道討西突

厥沙鉢羅可汗賀魯又詔阿史那彌射及族兄步真爲流沙安撫大使

分出金山道十二月定方至金山北擊處木昆部大破之進至曳啞河

西賀魯帥十姓兵拒戰定方擊之大潰追奔三十里明日整兵復進賀

魯與處木昆屈律啜數百騎西走時阿史那步真出南道五咄陸部皆

詣步真降定方命蕭嗣業回紇婆閏將胡兵趨邪羅斯川定方與任雅

相繼之復大戰伊麗水上賀魯輕騎奔竄渡伊麗河兵馬溺死者甚衆

新唐書地理志云伊麗河一名帝帝河是又方言所傳足廣異聞矣乾

隆二十年始定伊犁

方畧載是年五月壬辰定邊左副將軍阿睦爾撒納等奏言臣等帶兵自入準噶爾邊境以來遠近

皆望風歸附迨至伊犁沿途厄魯特回子喇嘛等有牽羊攜酒迎叩馬

聖主恩旨宣布曉諭

前者有率其妻子額手道旁者臣等恭奉所在人衆咸稱準噶爾地方數十年來兵革相尋羣遭塗炭達瓦齊自爲台吉荼毒所屬毀殘黃教衆人不但無以爲生將立見骨肉離散今

大皇帝撫育羣生遣兵拯救我等得以瞻仰天日出於水火不勝歡抃臣等見道旁居人並未遷徙耕牧如常且老幼婦女毫無驚懼前後隨行踴躍鼓舞伏思 皇上籌畫萬全一一洞鑒於事幾之先臣等仰承指授得以迅速奏功實千古未有之事現今即渡伊犁河務擒達瓦 二十五年 是年先告祭伊犁文曰朕受命承家化綏億域齊俘獻 懷神秩禮馨格一心爰從乙亥之春王師申討始達伊犁之境時雨効靈準人既即敘以教寧回部更偕來而式廓波恬兩岸屢憑舟騎之通派合千山早受販章之隸惟神嘉貺翊我大勳萬里而遙久繪圖以攬勝五年而近常揆藻以抒忱特崇齋帛之文肇舉祭川之典瑞升雲物自今加澤邊氓功溉土田以歲長款國祀浩浩崑墟之北比於瀆尊洋洋蒲海之東 秩祀伊犁河 文曰惟神洪源遠濬沛昭茲坎德醴牲用潔遣告維虔 朝宗有本協盈虛於坎德用涉咸昭境過渠搜遐控流沙而外地連越匿舊傳伊列之名環絕域以含滋亘平原而布潤効靈不爽錫典宜優朕撫馭寰輿枚寧荒徼定準噶爾之全部剝木遙通俘厄魯特之名王恬波共慶惟茲巨川之利濟實當大漠之奧區聲教所宜懷柔悉協在昔六師飛渡既彰孚佑之床於今千耦興屯益普灌輸之利爰隆秩祀特詔祠官頒制帛以孔虔練吉辰而肇舉春秋將事萬里宏漸被之規牲醴薦馨諸蕃享澄清之福尚希昭格來享苾芬侍讀錢大昕之詞也

河水西北流過雅瑪圖嶺北

西域水道記卷四

三

伊犁河西北流逕特里穆圖嶺北特里穆圖泉自嶺陰北流遇沙而伏

河水又西北流逕沙喇博霍齊嶺北 蒙古語博霍齊牝牛也謂山形如黃牝牛 嶺有水北流

溉回莊而止河水又西北流逕雅瑪圖嶺北嶺有水北流遇沙而伏自

二河會流水口至雅瑪圖嶺九十里乾隆二十一年定西將軍策楞奏

侍衛福昭等訛言台吉諾爾布於正月二十一日在雅瑪圖嶺擒阿逆

即其處也

又西哈什河從北來注之

哈什河發哈喇古顏山南麓 準語古顏謂股也山腰以下石色深黑故名 源處極四十四度

八分西三十二度四十五分湧泉成池菹澤星布蕩而西流數里賽里

克察罕烏蘇自北來匯乾隆二十二年定邊將軍成袞扎布奏侍衛烏

爾登於六月初九日追賊尼瑪等由博羅和羅山口往哈什河源一路

山險雪融泥淖難行是其地矣沿哈什河北岸皆伊犁圍場一水所匯
爲一圍凡十圍以次而西賽里克察罕烏蘇之東卽第十圍也哈什河
又西流六里布爾哈斯台水自南來匯圖爾根察罕烏蘇自北來匯乾
隆二十三年參贊大臣巴祿奏言搜剿瑪哈沁至扎木巴拉布拉克之
源喀喇沁參領賽圖於圖爾根察罕烏蘇剿賊四十餘人是也哈什河
又西流十里阿布達爾摩多水自北來匯又西流五里哲里摩多水自
北來匯又西流五里阿爾斯朗圖布董水蒙古語阿爾斯朗獅子也布董謂物之麤大者言其地之
山麤大又自北來匯又西流十五里哲庫布董水如獅子形自北來匯哲庫布董
水西有無名水一亦南流匯哈什河哲庫布董水西十里哈布齊克布
董水南流匯哈什河又西十里烏里雅蘇台水南流匯哈什河乾隆二
十二年成衮扎布奏言六月初九日明瑞在額布圖一作額嶺口遇賊

西域水道記卷四

三

千餘擊之奪其寨追至額林哈畢爾噶之烏里雅蘇台河賊人占據山
崖排列鎗礮在此水之側也哈什河又西五里喀喇河南流匯哈什河
喀喇河東有無名水一其西有無名水四皆南流匯哈什河喀喇河西
二十里巴爾加圖水南流匯哈什河巴爾加圖水東有無名水二亦南
流匯哈什河諸水皆發自北山山無林木惟水道所行喬柯交蔭登高
遙矚若蒼龍十餘蜿蜒南走奔赴巨壑空山豐草自成周陟每歲官兵
行圍以習馳逐己卯之秋余隨將軍晉公昌字晉齋校獵於此營合圍會
離散別追徑峻赴險越壑厲水箭不苟害弓不虛發長楊羽獵未足爲
侈迨乎弭節返次旃廬和門所嚮臨乎哈什巴爾加圖南直特穆爾里
克嶺嶺陰之水北流來匯哈什河又西傍北山流二十里經齊齊爾哈
納托海營南有泉發自營西半里流經營南匯於哈什河齊齊爾哈納

者彼土之樹細葉如柳結子小於櫻桃而色淡黃味酸微澀野雉食之
叢生水灣中高皆丈餘營南隔岸爲呼賴特穆爾里克嶺嶺趨而北河
流漸隘喀什河經營西一里沙喇布拉克水自北來滙喀什河西流入
峽又西流十里經胡吉爾台嶺南哈克布阻水自北來滙南北山勢復
開喀什河又西傷北山流十里呼濟爾吉爾瑪台水蒙古語呼濟爾
也言曠地而水有
小魚自北來滙又西傷北山流十里察察吉爾瑪台水自北來滙喀什河
又西傷北山流二十里稍折而南摩多圖吉爾瑪台水自北來滙三吉
爾瑪台水獨此有林木其山四面高阜中平曠周十餘里將軍頓宿於
茲水來自山東北隅峽中澄清無滓余與領隊大臣布君彥泰策馬峽
中溯流十里孱顏積黛蒙籠撥雲幽討造深賞心斯契垂綸投餌白小
盈筐水自峽出南流經將軍營東自山東南隅峽出峽長里許怪石狎

西域水道記卷四

古

犴纍纍塞路激湍環曲琴筑齊鳴層嶂銜日晚照薄林余復與布君褰
衣躡磴徙倚山腹晉齋將軍籃輿相就料數茶鎗指揮談塵清言畢景
無負溪山矣水達山外南流數里滙喀什河傷南山流其南山曰烏圖
嶺又西七十里經都爾伯勒津回莊南自寧遠城以東三百里皆回民
田迄此莊而止乾隆二十年參贊大臣策楞奏言諾爾布林沁擊敗阿
巴噶斯等欲整兵進剿而塔本集賽黨惡據險恐爲夾攻已移游牧於
都爾伯勒津之地謂此也使準噶爾行程記云自空格斯河六十里至
都爾伯勒津又一百二十里至策妄阿喇布坦游牧今自空格斯行者
空格斯河岸十里至烏圖嶺越嶺西北行二十里渡喀什河河北岸渡
口曰察罕拜牲自此西北行五十里至都爾伯勒津莊其西百二十里
在蘇布台蒙古語凡有穴
者曰蘇布台以東山勢平敞宜爲準部駐牧之所喀什河

又西流二十里呢勒哈

蒙古語謂幼孩日呢勒哈

水自北來匯呢勒哈水發自呢勒

哈山其山東西兩阜張股如箕水傍西阜之左南流達山外既回民田

瀦為水磨經回莊滙於河乾隆二十三年定邊將軍兆公惠奏言博羅

布爾噶蘇嶺內呢勒哈有布魯古特之琿齊二百餘戶居住臣派瑚爾

起以兵四百人往至呢勒哈河適遇遷移游牧即行圍剿殺賊四五十

人琿齊等登山乞降即登此東西阜矣回莊東一里有三泉並發共流

經將軍營南西流至回莊南亦滙於河哈什河自巴爾加圖以西渠并

漸多波瀾增遠南岸峭壁卓立水次石罅松林重掩蒼翠閒花野蔓雜

綴青紅北岸石磯與水吞吐余偕布君每向日晡河干促坐借彼濤聲

滌茲塵耳澄沍深碧似鏡通明俯拾文石盈於懷袖哈什河又西傍北

山流經都圖嶺北又西經阿布喇勒山北阿布喇勒者在惠寧城正東

西域水道記卷四

一作阿布蘭山蓋音之轉

自城闔東眺孤嶂高聳眾峯皆斷故諺曰獨山焉乾隆二

十八年始祀之

文曰惟神秀甲金方勝標玉塞崇岡起伏從慈嶺以分

支壘嶂峻嶒界烏孫而作鎮近通哈什遠控伊犁納喇

特峙其陽翠屏儼對空格斯繞其左碧水如環緬靈異之風傳宜馨香

之式薦朕丕昭武畧龕定遐荒昧谷之西遣亥章以測日輪臺以外駐

戍已而開屯乃眷名山實稱福地犁庭露布久徵默祐之功觸石雲興

允著懷柔之效緬販章之式廓庶沙磧之永寧嘉貺聿臻明禋肇舉刊

旅未詳於禹貢始知際會有期庶載考夫周官益信報功不爽春秋

望秩瞻峻極於北庭風雨和甘垂祐庥於西海自今以始申錫無疆

哈什河又西經烏蘭庫圖勒嶺北謹按方畧乾隆二十年九月參贊大

臣策楞奏拏獲叛賊納旺據稱八月二十三日宰桑克什木搶掠臺站

二十四日將軍大臣等帶兵沿河向空格斯行走二十九日宰桑克什

木句敦多克曼集句烏克圖句圖布慎句巴朗句及喇嘛回人等率眾

前至烏蘭庫圖勒圍守將軍大臣正在搶掠班將軍鄂參贊俱行自盡

薩將軍由小路帶達什達瓦兵百人脫出又按班第傳班第與鄂容安

陷賊中由固勒札赴空格斯轉戰至烏蘭庫圖勒賊蜂集力不支遂各自盡是二公殉節之地載在冊書變亂之後傳聞失實以為在渾都賴

山故樹碑於彼而烏蘭庫圖勒反為射雉場無茅蕪以棲忠魂策馬留

連愴焉悲楚

余復為詩以正之曰世俗徒耳食故府誰研搜况在草昧初遺事成繆悠伊犁有雙烈照耀天西甌當其効命時咤

叱風雲愁英姿碎趙壁生氣輕吳鈞碧血沾草盡黃衫無人收差峩烏蘭嶺悽愴長千秋傳聞胡失實表路芟松楸豐碑相對立轉在危溪頭

肅然下馬拜不見靈之旂目驗尚如此 哈什河又西經烏蘭嶺北車布

考古將安求盛名豈泯没荒落慙前修

附錫布推哈坦巴圖爾傳

登傳云和託輝特逆賊青滾雜卜叛車布登將以兵會參

贊塔爾瑪善赴烏蘭嶺追剿阿睦爾撒納謂此嶺矣哈什河又西經吉

勒蘇胡嶺南

蒙古語吉勒蘇胡謂日光晃眼也

額林摩多水自嶺東來匯嶺南數里懸

崖聳峭危石倚空哈什洪濤衝鬻其趾攀援如蟻臻其絕頂路轉山回

劣容馬足山中石璞往往鑄科木什木博第薩都佛呪

即華言觀音呪唵瑪呢叭唵吽

西域水道記卷四

六

六 綽克圖贊丹經大旨言瞻拜如來三十五尊佛得解罪孽往生極樂

又有求福於松喀巴喇嘛

華言達摩也

發願之詞曰米克哲木皆蒙古書或

唐古忒書厄魯特人云昔準部時山水暴溢數致災害勒石此山患遂

止絕相傳是五百年物余與從者就馬上攜數石歸番僧見之輒先頂

禮哈什河又西流胡吉爾台水自北來匯又西流三十餘里烏里雅蘇

圖水自北來匯胡吉爾台西迄於烏里雅蘇圖連岡疊巘土皆赤緹山

巔崩坼溜痕宛然麓有碎石搏結堅實正圓如甕各有嵌石石鑿番字

與吉勒蘇胡嶺石相同考驗厥狀益怒濤挾沙團積成阜襍災之說或

不誣矣哈什河又西流二十餘里摩多圖蘇布台水自北來匯又西莫

霍爾蘇布台水自北來匯又西胡爾圖布拉克水自北來匯三水相去

一里而近哈什河又西流二十餘里沙喇蘇台水自北來匯沙喇蘇台

三支並發自北山西南流而滙折而東南滙於喀什河其東有無名泉
二俱發自北山南流滙於河喀什河又西南流三十里經渾都賴山南
山麓有溫泉以木爲檻行役往來於斯澡浴山陰卽博羅布爾噶蘇之
營也博羅布爾噶蘇山自營北周其西以屬於渾都賴其西南有谷口
博羅布爾噶蘇水由此達山外喀什河北岸大山縣亘數百里以此爲
門戶扎拉豐阿傳云乾隆二十年四月偵達瓦齊居察卜齊雅勒扎拉
豐阿偕薩喇勒由博羅塔拉馳赴博羅布爾噶蘇奪隘口抵登努勒台
沙喇扣肯傳云阿睦爾撒納爲大軍所迫竄哈薩克巴圖爾烏巴什覲
據伊犁轄四衛拉特聞我師有備竄察罕烏蘇句博羅布爾噶蘇句阿
勒坦特卜什句勒卜什沙爾海諸境是知爲伊犁東境要害矣渾都賴
山與南山相逼束河如堵牆喀什河西流五里淵深渟滯北出其隘復

西域水道記卷四

七

西流其北岸卽俗傳雙烈効命處乾隆四十三年班公之子福祿成伊
犁公之孫慶麟亦來爲厄魯特營領隊未稽國史遂於其地建立方碑
並立鄂公碑一通余展拜碑下陰崖慘淡幽不見日水流嗚咽似有餘
憤神所憑依或在是焉河經班義烈公碑南又西數十步經鄂剛烈公
碑南又北流折而西南十餘里渾都賴山勢向盡博羅布爾噶蘇水自
東北來滙博羅布爾噶蘇水發自博羅布爾噶蘇山南流折而東經將
軍營東復西南流有泉發自營西復南流來滙共西南達谷外疏爲渠
溉回民田回民居水涯耕作者千一百戶水復西南滙於喀什河
達山外西南流十數里疏爲渠導以西北流三十里經鄂什塔斯坦回
莊東二十里清流奔瀉水上駢架三橋以濟往來嘉慶二十一年松公
筠疏言阿奇木伯克霍什納扎特於喀什河舊渠展鑿二十餘里長一

百七十餘里西北接濟爾噶朗水卽此渠也哈什河又西南流經雅瑪圖嶺北嶺西十餘里有舊鉛廠哈什河直鉛廠之北匯伊犁河匯處極四十三度四十一分西三十四度二十分兩河間皆沃壤回民耕之乾隆二十八年始秩祀文曰惟神澤沛金方靈昭坎德滙特克斯而共注眾派同歸經固勒扎以分流平原獨沃淵澄方折記玉水之滌洞績著安瀾靜銀波之浩淼効靈不爽錫典宜隆朕撫定遐陬牧宰荒服塞烟隴月駐細柳以開營雪浪風濤挾飛艘而競渡惟念斯河之天險益慶今日之波恬粵稽唄鹿名州益增式廓爰布沈耜令典用妥神明康我邊陲永秩春秋之祀綏爾蕃部共歌清晏之床肅此苾芬尚其昭格

河水又西北過察布察爾山

察布察爾山口東距雅瑪圖嶺七十里察布察爾水發焉乾隆二十三年副都統由屯追鄂哲特帶兵二百餘名晝夜兼行三月二十一日追及賊衆於察布察爾河口之蘇瑪爾罕令薩壘爲左翼奎蘇德爲右翼

西域水道記卷四

六

由屯與侍衛拉瑪錫居中奪賊所據山谷追至特克斯河殺賊二百餘人察布察爾水北流經洋薩爾回莊東溉其田止不流

又醜爲錫伯渠

乾隆三十年自盛京移錫伯部官兵千一十八人駐伊犁河南岸去河數里舊有一渠東西長二百餘里渠北地隘慮在無田渠南阻崖患在無水嘉慶初有部人圖默特創議於察布察爾山口引水自崖上鑿渠亦東西長二百餘里功費繁鉅部人嗟怨圖默特卒排衆議數年乃成旣濬新渠闢田千頃遂六豐殖雄視諸部鄭白之沃不足云也圖默特後以塔爾巴哈台領隊致仕部人頂而戴之同於父兄新渠東北有積水潭廣數里環潭皆回民田松公筠因新渠成以潭西南二面田二千畝畀錫伯錫伯之界遂東移新渠自察布察爾山口經回人館北入

新界經積水潭南二十餘里又經塔什布拉克南溉錫伯正黃旗田又西六十里經察罕拜姓南溉錫伯鑲紅旗田又西五十餘里經巴圖蒙柯北溉錫伯正紅旗田又西十餘里至豁吉格爾北溉錫伯鑲黃正白二旗田而止舊渠引水十餘里至大橋入新界又西二十里經錫伯館南其地與河北寧遠城相直也又西三十里經錫伯正藍旗地南溉其田其地與河北惠寧城相直也又西三十餘里經錫伯鑲白旗地溉其田田之東有枝渠分舊渠水滙於河又西三十餘里經巴圖蒙柯軍臺南其地與河北惠遠城相直也軍臺西數里又經錫伯鑲藍旗地溉其田而止兩渠相去十餘里新渠高於舊渠六七丈新渠之南並南山下皆回民田

又西過寧遠城南

西域水道記卷四

九

伊犁河北岸縣亘諸山距河或百里或百餘里博羅布爾噶蘇山西曰登努斯台山有水西南流爲呼魯蘇台水又西曰明瑪魯山有水南流爲畢立海水又西十餘里山亦有水南流爲渠立海水二水皆滙於呼魯蘇台水溉回莊田渠立海水西有薩薩布拉克水又西有哈尊齊水溉其莊田而止又西爲濟爾噶朗河河發自北山南流東距博羅布爾噶蘇谷百四十餘里呼魯蘇台水經鄂什塔斯坦回莊北而西流六十餘里與濟爾噶朗河滙復西南流溉濟爾噶朗回莊田而止準噶爾時阿勒陶沁鄂拓克宰桑塔爾巴住濟爾噶朗河其水舊達伊犁河今溉田無餘水濟爾噶朗河西十里至固勒札渡口乾隆二十年定邊右副將軍薩喇爾奏言臣等於四月二十七日領兵至登努勒台班第阿睦爾撒納於二十八日領兵至尼楚衮兩路大兵駐劄相距二十里臣等

議一同進發北路兵由伊犁河之固勒札渡口越特穆爾里克嶺前進西路兵由喀塔克渡口越扣們嶺前進由此直抵達瓦齊所居格登地方也渡口置倉額貯回屯糧三萬七千一百九十餘石

伊犁凡五倉貯糧各有額惠遠城倉貯十一萬九千七百二十餘石惠寧城倉貯八萬九千四百一十餘石綏定城倉貯二萬二千四十餘石塔勒奇倉貯一萬七千三百五十餘石併固勒札而五倉員一人駐之倉臨大河灘聲聒耳荒沙童阜四無居人

乾隆三十二年將軍阿公桂疏言回民所納糧貯固勒札倉距惠遠城九十里難於車運令每旗造船二隻是年試運至三十七年船成每年始季春終季秋由倉運糧四萬石輸惠遠城倉以供兵食伊犁河逕倉南又西八里逕寧遠城南寧遠城即固勒札也準噶爾曾徙庫車回族鄂對於此地與河南之海努克相望西藏總傳云初厄魯特崇黃教噶勒丹策凌建都綱於伊犁河濱北曰固勒札南曰海努克設西勒圖四

西域水道記卷四

集喇嘛千餘以塔本集賽輪值贍之每歲首及孟夏台吉宰桑等咸往瞻禮都綱者大寺也諺稱固勒札曰金頂寺海努克曰銀頂寺固勒札

都綱為阿睦爾撒納所燬余宿海努克軍臺

臺西距巴圖蒙柯軍臺九十里

搜訪遺蹤

臺南半里許小阜隆起殘刹數椽頽垣斷壁丹青藻井黯淡猶存朋素克傳云乾隆二十五年副都統伊柱視伊犁屯田至海努克獲虎紐銅

章一文曰管轄厄魯特後旗札薩克印驛封至蓋雍正四年頒給茂海

物也

茂海事見特穆爾圖淖爾條下

茂海叛挈往準噶爾獻噶勒丹策凌至是得之所

謂海努銅印也得印之歲伊犁辦事大臣阿公桂疏言伊犁名勝之地河北無過固勒札河南無過海努克海努克現有回民三百人即令安居不使移徙並於其地建一小城駐兵數百人以遏哈薩克布魯特等所通之路至來年陸續移來七百戶回民均令駐劄固勒札建一大城

所有大臣衙署倉廩俱修於此尋停海努克建城議二十七年於固勒
札建寧遠城高一丈六尺周四里七分門四東景旭西環瀛南嘉會北
歸極城外東北隅半里許沙阜上恭建平定準噶爾勒銘伊犁前後碑

二通碑為乾隆中聖製前碑曰惟天盡所覆俾我皇清罔不在

世祖肇基宅中皇者其武聖祖

克臻郵隆逮予藐躬思日孜孜期四海同風谷汝準噶爾亦蒙古同類

何自外攜數世梗化篡奪相仍碩仇其下厥達瓦齊甚毒於醒衆心疾

疾如苗斯蠱如虺斯螫衆口嗷嗷視爾嗷止予焦勞止期救不崇朝止

視爾底止子噫嘻止亟出汝塗泥止乃命新附爾為先鋒熟悉其路乃

命勁旅攜數月糧毋或掠擄師行時雨王旅暉暉亦無潦阻左旋右抽

王旅渾渾既暇以休烏魯木齊及五集賽度之折折台吉宰桑迎降恐

後奚事奔吭波羅塔拉圍爾奇嶺險如關闔倒戈反攻達瓦齊走且夕

塗窮回部遮獲彼鼠斯喙地入無隙露布飛至受俘午門爰貸其罪自

今伊始四部我臣伊犁我宰桑公臣屬我旗籍誰汝苦辛爾恭爾長爾

可汗衆建王公游牧各安宰桑公臣屬我旗籍誰汝苦辛爾恭爾長爾

孳爾幼徐以教養爾駝爾牛爾羊爾馬畜牧優游分疆各守毋相侵陵

以干大咎齊禦外域曰布魯特越哈薩克醉飲飽食敬與黃教福自天

錫伊犁乎矣勒貞珉矣於斯萬年矣後碑曰天之所培者人雖傾之不

西域水道記卷四

可殛也天之所覆者人雖裁之不可殖也嗟汝準噶爾何狙詐相延以
世而為賊也強食弱衆凌寡血人於牙而蔑知俊易也云興黃教敬佛
菩薩其心乃如夜叉羅刹之以人為食也故罪深惡極自作之孽難追
活也先是分封四部衆建宰桑四圖什墨廿一昂吉蓋欲繼絕舉廢以
休以息也而何煽亂不已焦爛為期終於淪亡胥盡伊犁延袤萬里寂
如無人之域也是非我佳兵不敢以殺為德也有弗得已耳西師之什
實紀其詳悉也以其反覆無常遲益久而害益深則其叛亂之速未嘗
非因禍而致福也是蓋天祐我皇清究非人力也伊犁既歸版章久安
善後之圖要焉已定者詎宜復失也然屯種萬里之外又未可謂計之
得也其潛移默運惟上蒼鑒之子惟奉時相機今日之下亦不敢料以
逆也是平定準噶爾後勒

城中置第三品阿奇木伯克一人轄回民六

千三百八十三戶除服役採鐵凡田者六千戶乾隆三十八年將軍伊

公勒圖分六千戶為九屯戶納糧十六石歲以九萬六千石為額五十

九年將軍保公寧以回民墾田日增歲加納糧四千石每戶額徵糧十

六石六斗六升六合六勺有奇嘉慶九年將軍松公筠撥遣屯田給回

民歲加納小麥二千石所屯田自寧遠城北迤東至都爾伯勒津莊又

河南傍南山陰皆回屯也

又西過熙春城南

熙春城者地曰哈喇布拉克乾隆四十五年將軍伊公勒圖建城高一丈周二里二分門三東覲恩西凝爽南歸極屯鎮都司駐之東南距寧遠城十里寧遠城北百餘里有關里沁山關里沁水發焉東距濟爾噶朗河五十餘里水南流經關里沁卡倫北折而流經其西卡倫在惠寧城東北三十餘里西南流經舊渠口舊渠者關里沁水故道至此分為渠東南接濟爾噶朗水以溉其莊田自霍什納札特引哈什河水西北接濟爾噶朗渠以灌關里沁之百五十戶回民田而斷關里沁渠口使其水惟西南流專達惠遠惠寧二城旗屯焉關里沁水西南流分二支一支南流為沙河經惠遠城旗屯二工田東又南流經寧遠城西里許由大馬廠地名滙

西域水道記卷四

大河一支西南流為正渠至惠寧城東北分二渠北渠經惠寧城旗屯北溉其田而止南渠經惠寧城旗屯南復自城北入其城而止正渠又南經惠寧城東分一渠南流溉熙春城綠營頭屯田而止正渠又折而西經惠寧城南又西經阿奇烏蘇堡北達通惠渠熙春城西北十里至惠寧城

又西過惠寧城南

惠寧城者地曰巴彥岱乾隆三十一年將軍明公瑞建城高一丈四尺周六里三分門四東昌彙西北豐南遵軌北承樞其東墉下有水泉城屢圯嘉慶十年松公筠向西移築南北各接築百九十五丈新築西面三百丈凡城周千三百六十四丈南北偏西增城門二西北曰綏成西南曰協阜在惠遠城東北七十里乾隆三十五年移駐西安滿洲官兵

二千二百有四人置領隊倉員各一人明年將軍舒公赫德復移綏定

城巡檢駐惠寧城城南距河三十里城北為阿里瑪圖山準語阿里瑪

謂果樹地有果樹阿里瑪圖水發焉是為東阿里瑪圖水曩者水達伊犁河今引溉惠

寧城西旗堡田無餘水乾隆二十八年秩祀阿里瑪圖河文曰惟神德

洽盈虛功資灌溉屬塔勒奇之左幹帶水分流環海努克之西偏平沙交錯涵濡嘉

植千林呈離實之英迥抱長川萬井沐滋培之益地靈克効祀事孔將

朕既顯武功用敷文命東風受吏聿彰柔遠之謨溟海來王共叶安瀾

之慶緬神功之布潤蔚物產之含滋秋實春華平衍溥自然之利濟川

作楫利涉占攸往之宜特詔祠官祇申歲祀錫鴻儀於望秩阿里瑪圖

肅薦馨香荅靈貺於元冥永光俎豆春秋勿替昭鑒在茲水東闢里沁水西曰毛海圖山亦有水南流而止毛海圖山北數十里

為庫克哈瑪爾將軍牧場也庫克哈瑪爾水流不出山而止又北八十

里至畢齊克圖其水亦不出山而止又北為卻羅嶺嶺北與瑚素圖布

拉克軍臺相望也

西域水道記卷四

又西過黃草湖南醜為惠遠城旗屯渠

黃草湖在惠寧城西十里湖周五六里旗屯渠者一曰大渠一曰通惠

渠嘉慶七年將軍松公筠以惠遠城八旗生齒繁富須議恒產而經費

有定非廣闢屯田不可遂於黃草湖鑿渠引伊犁河水北流折而東又

折而西凡二十五里經澇壩灣又西數里至爬梁為大渠經鑲白旗地

界北溉其田又西經稻田北溉數萬畝又西至雙橋莊惠遠城分為二

支渠一引餘水自惠遠城東匯於河一引水至惠遠城北入城而止稻

田之南為民渠於惠遠城東十餘里河岸引水疏為渠渠南為民稻田

其渠餘水與大渠餘水同匯於河民稻田者乾隆二十八年商民張尚

義等二百戶報墾蔬地稻田萬六百六十八畝每畝徵課銀一錢余嘗

夏秋之間往來惠寧路經渠畔左右水田新禾穠稔賓鴻白鷺遠近翺

翔宛成江鄉風景矣鑿大渠之明年松公筠復以地勢北高南下大渠之北水利難資因令總兵納爾松阿於爬梁分水北流至皇渠橋距滂

十里又北而東至紅柳灣距皇渠橋八里折而西至小地窩鋪距紅柳灣十里漑大渠以

北之田是曰通惠渠土人謂大渠為將軍渠通惠渠為鎮臺渠云通惠渠又西至惠遠城北與烏哈爾里克河渠匯

又西過阿奇烏蘇堡南

黃草湖水流十里經阿奇烏蘇堡南阿奇烏蘇者惠遠城旗屯公田也

嘉慶二十年松公筠所建築堡牆周千一百二十四丈共三里一分有

奇堡中廬舍百所移八旗壯丁居之每夫授田百畝仿古井田制也堡

南距河十里

又西過烘郭爾鄂博山南

西域水道記卷四

舌

準語謂黃曰烘郭爾言壘石處黃色也山東與阿里瑪圖山接西至惠

遠城北十五里而止乾隆二十三年定邊將軍兆公惠奏捉生詢問言

特古斯孟克與昂吉岱屬人齊默特等同行至烘郭爾鄂博遇哈薩克

哨探兵五十餘人檢特古斯孟克去蓋昂吉岱先由阿圭雅斯遁於沙

喇伯勒又由沙喇伯勒渡伊犁河至濟爾噶朗故經烘郭爾鄂博矣山

產煤今存礦三十四所恒充伊犁九城用山之西麓曰紅山嘴在惠遠

二十里每冬習礮所也乾隆二十八年始秩祀文曰惟神鍾靈地絡分脈天山南眺伊犁與塔勒奇

以並峙西通蔥嶺鎮衛拉特以稱雄符艮德以安敦助宣元化臨兌方

而聳拔夙著神威沙暖草肥洵真靈之祕宅巒環谷抱實絕域之奧區

朕拓地烏孫洗兵魚海單于繫頸三捷成掃穴之勲貳負陳尸列戍息

傳烽之警選重臣以留鎮度沃壤以興屯益恢一統之模爰秩百神之

祀曩者籌邊五夜曾識聚米之形今茲刊旅九山長作維屏之固迺咨

祠部載練吉辰典禮肇稱薦馨香以昭格懷柔式應配嶽鎮以尊崇補

山海之圖經傳於奕禩表渠支之疆域綏我邊黎用奠清尊永垂鴻祐

山南距河四十餘里

又西過惠遠城南

伊犁河逕阿奇烏蘇堡西流四十二里逕普化寺南寺為喇嘛住持之

所乾隆二十七年初建於綏定城東北五里日興教寺越五年阿公桂

移建於河北岸寺即臨大河也每歲十二月二十九日喇嘛跳布扎

護法經如 中正殿之儀余偕成侶聯騎往觀舞態低昂恣為歡笑

扎俗謂之打鬼徐蘭芬若作塞上集唐六歌其打鬼歌序云番僧最尊者為呼畢勒罕能悟前身人稱之曰呼圖克圖華言再來人也次朝爾吉次扎薩次喇木占巴次噶卜處次溫則忒次德木齊次格隆次格思規次格素勒次班第次格由巴次綽由巴次骨捨爾次顛馬女僧為尺巴甘赤有室家者男為吳巴什女為吳巴巴三氣總名之曰喇嘛打鬼者梵言布扎是日佛殿上燃燈千盞建大旗於殿四隅繪四天王象綽由巴鳴金傳執事者齊集設呼圖克圖座於殿之東朝爾吉以下俱列坐一僧名茶勃勒氣散淨水於眾僧掌中無常職班第為之几上陳胡朗叭令以醜醜鬼戲作二甲士左右立以帛束口恐人氣觸之鬼不食也班第扮二小鬼對舞一夜又睨其旁向內一呼即潛入人叢中撒麩以眯人目殿內吹剛東番樂器諸樂隨之以奏格素勒十二人戴假面扮馬哈喇佛備極殊怪雙雙跳舞而出其一曰厄利汗文殊化身二曰

西域水道記卷四

作嘛知文殊之護法神三日嘛哈噶喇四日喇嘛皆觀音化身五日威又叭喇六日滋那迷渣七日嘛基阿拉渣八日冬現著薩九日生合冬東十日出孫冬東十一日薩拉瓦十二日摸黑皆觀音之護法神惟厄利汗薩拉瓦為牛鹿假面餘皆不可辨格隆十人扮十地菩薩錦衣花帽繼之而出手執腦骨椀枯骸棒久杵綵縷等物旁立番僧數百人手持鼓與敏鼓敏之徐疾隨其跳舞之節奏尺巴甘赤吳巴什夫婦執香環遶溫則忒宣開經偈眾僧朗誦秘密神咒吽聲如雷鈴聲如雨喇木占巴以胡頭叭令擲於地於是牛鹿二假面持刀斫地作殺鬼狀復有一僧曰乃沖戎裝執戟吐火吞刀云神附於身觀者皆膜拜奉界單於神以問休咎跳舞畢格由巴以糖一鉢候於戶抹眾僧之口而佛事終焉余詢之譯者云烏斯藏有碉房為邪祟所據白晝攫人飲食喇嘛乃扮假鬼飲食於房中以誘真鬼因扮諸佛排闥以入而打之故名之曰打鬼今京師番僧寺上元除夕亦為之蓋猶周禮帥百隸以時儺之意也 河逕寺八里為惠遠城極四十

三度五十分西三十五度強乾隆二十八年將軍明公瑞奏言烏哈爾

里克新城僅敷現在官兵駐劄惟近城三四十里伊犁河岸高阜之上

可築大城所用木植有阿布喇勒山松杉甚多預行斫伐從哈什空格

斯等河造筏直至城工對岸且在新城及固勒札回城之間糧運亦便

地既產煤又採柳條蘆葦柴薪不乏踰年城成高一丈四尺周一十六百七十四丈共九里三分門四東景仁西說澤南宣闔北來安五十八年將軍保公寧於城東展築二百四十丈共一里三分三釐有奇新舊城共十里六分三釐自乾隆二十七年始置將軍參贊各一人二十九年置領隊四人三十一年移熱河涼州莊浪滿洲蒙古官兵四千三百七十人又迭置理事撫民同知倉員巡檢新疆之都會也城南距河二三里積年河徙侵刷北岸率以柳圈絡石禦之水長輒壞河距城僅半里許嘉慶十二年松公筠命故河道總督李亨特相度形勢創築挑水土壩長六十餘丈底寬七丈頂寬四丈迎溜築埽鑲護水至掛淤土人命爲李公隄閱十年河流愈北侵齧堤根而城東二里有地名磚瓦窰者河於其處衝岸成灣水勢趨城東南隅二十二年盛漲驟至李公隄

西域水道記卷四

美

全淪於河臨河有高樓紅欄碧瓦俯瞰洪濤糧艘帆檣出沒其下南山雨霽沙市雲開酒榼茶鎗賦詩遣悶蒼茫獨立興往悲來乾隆中忠遠城駐防鳴鐸見樓岸下有穴發之得銅佛八九枚瓦佛數千或以爲阿睦爾撒納擾伊犁時喇嘛所藏未知其審入宣闔門西走南墉第三舍爲余老芙蓉庵成館讀書擊劍對酒狂吟因作新疆賦也昔紀文達公云伊犁無井皆出汲於河一佐領曰城中多老樹苟其下無水樹安得活乃拔木就根下鑿井果得泉今城中處處鑿井與草昧時異又西烏哈爾里克河注之

烘郭爾鄂博山層疊而北迄於卻羅嶺凡百二三十里卻羅嶺西接塔勒奇嶺乾隆二十年定邊左副將軍阿睦爾撒納疏報有額林哈畢爾噶宰桑阿巴噶斯等來降詢知去年十月巴特瑪車凌句額林沁句阿

布賚領厄魯特哈薩克兵萬餘將博羅塔拉等處游牧人衆盡行搶掠
阿布賚於塔勒奇嶺東將擄掠人帶回巴特瑪車凌額林沁帶兵四千
餘入伊犁達瓦齊拒之所謂塔勒奇嶺東即接卻羅嶺處也塔勒奇嶺

爲伊犁北境門戶乾隆二十八年始秩祀

文曰惟神保障金方安敦兌域南屏拱抱沿山之鄂博星

聯北渚迴環俯水之摩多錦簇源泉有本開一鑑於峯頭烟火相望聳孤城於遙岸形勢冠絕域典物錫以隆文朕遠服威賓西戎即叙壺漿載道受蕃長之來降旗鼓分馳擒叛臣之往竄默孚神貺迅奏膚功設百雉之雄關弓懸新月導雙流之谷口馬飲清泉爰錫廢縣用申望秩屆春秋而頌帛慶雉譯之咸通諏辛甲以薦馨保鴻圖之常固尙其昭鑒永克歆承山有谷十餘東南向皆有

水南流最東谷曰石門溝

在綏定城東北百一十里

次西二十里曰香房溝其谷民

田二十餘戶又西十五里曰燒房溝其谷民田五十餘戶又西二十里曰白楊溝其谷民田八戶又西八里曰新溝其谷民田六戶各以溝水溉之餘水皆南匯石門溝水石門溝水又南流經中營二屯地沙喇布

西域水道記卷四

七

拉克水自西北來匯其水五泉並發同南流五里經沙喇布拉克卡倫

東沙喇布拉克軍臺西又東南流經席其臺南

西陽雜俎云席其一名塞蘆引古詩千里席其

草又元稹代書詩自注云予以席其草籌嘗在書囊以佐飲備按席其即漢書西域傳之白草西域處處有之今人猶或用以爲箸俗呼爲集吉草又曰芟芟草皆席其字誤也其叢生根蟠大處曰臺凡二十餘里匯石門溝水水又南流至綏

定城東北右分爲渠渠西南流分爲二支一支經其城北繞城西南溉營屯田一支經城東分水入城復南流經演武場而止綏定城者乾隆

二十七年參贊阿公桂所建地曰烏哈爾里克準語烏哈爾驚鷲也東

南距惠遠城三十里城高一丈七尺周四里三分門三東仁熙西義集

南利渠北故有寧漠門今已塞伊犁自乾隆二十五年置屯鎮總兵官

轄綠旗兵以綏定城爲中營四十五年增置綏定城巡檢一人越三年

置倉員一人石門溝水經綏定城東是爲烏哈爾里克河乾隆二十一

年定西將軍策楞奏臣領兵至博羅布爾噶蘇今聞阿逆自烘郭爾鄂博帶兵往烏哈爾里克擊諾爾布臣等若由博羅布爾噶蘇大路前進恐賊易於知覺是以仍從山內間道行向烏哈爾里克往襲卽河所經也河自綏定城東乃左分爲渠渠東南流十餘里至紅山嘴礮廠溝分爲二支一支東南流溉旗屯田餘水滙通惠渠一支溉莊世福四十八戶田分餘水達惠遠城伊犁旗屯營屯四屯之外有客民報墾者曰戶屯始自莊世福乾隆三十七年莊世福等四十八戶墾田千四百四十畝三十九年張成印等二十三戶墾田六百九十畝四十六年王已興等三十戶墾田九百畝每畝皆徵課銀五分自惠遠城至綏定城甬道三十里榆柳交陰甬道之東紅山之西卽四十八戶田一望平疇隱藏村落熙熙皞皞太古成風渠近城北十里清流千章古木芳園桃杏丙

西域水道記卷四

三

舍松楸黃葉尋詩蒼庚送酒春秋佳日聊以寫慰烏哈爾里克河由綏定城東復南流八里經將軍橋下東西流二十餘里於惠遠城西里許滙伊犁河

又西過塔勒奇城南烏里雅蘇圖水注之

塔勒奇城者以山名之也城在山南百里乾隆二十六年阿公桂所建高一丈周一里五分六釐門三無名嘉慶七年北面展築四十丈二十一年東面展築三十丈共三里八分東距綏定城十里北距廣仁城五十里屯鎮守備駐之四十八年置倉員一人新溝之西二十餘里曰果子溝谷長七十里北有峻嶺扼之嶺上多松名曰松樹頭嶺嶺東有泉曰察察布拉克西流至谷中有紅水泉發自松樹頭嶺下來滙谷西山亦有水曰烏蘭烏蘇東南流來滙同南流經鄂博勒齊爾軍臺西

軍臺距松

樹頭三十里有烏庫爾齊布拉克水由東來滙又南流有烏博勒齊爾水由西來滙凡三十五里經塔勒奇卡倫西又南流三里有將軍布拉克水由東來滙又南流二里經塔勒奇阿璊軍臺東又南流里許達谷外奔湍迅急聲聞數里谷中跨水架橋四十有二峭壁夾路蒼松據崖山鳥飛鳴林木陰翳入伊犁者驛程經此塞沙眯目頓覺清涼迨乎初冬雨雪填谷行蹤斷絕又以是爲險隘也元長春邱真人西遊記云沿天池南下左右峯巒峭拔松樺陰森高踰百尺自巔及麓何啻萬株衆流入峽奔騰洶湧曲折灣環可六七十里二太子扈從西征始鑿石理道刊木爲四十八橋橋可並車薄暮宿峽中翌日方出入東西大川水艸盈秀天氣似春稍有桑棗按今伊犁絕無棗樹蓋四十八橋其來已舊今因其遺址爲四十二橋彼土不知遂謂前將軍保文端公所叛槽於訪古矣水於

西域水道記卷四

无

谷外南流經左營四屯地溉其田凡四十里經廣仁城東廣仁城者地曰烏克爾博羅素克乾隆四十五年將軍伊公勒圖建城高一丈三尺周三里六分門三東朗輝西迎灝南溥惠南距綏定城六十里屯鎮左營駐之城南爲沙梁果子溝水經沙梁東至東山灣有中營頭屯泉由西來滙又南流達於磨河磨河者烏里雅蘇圖水也當廣仁城西三泉並發南流經沙梁西由其南分爲二支東支東南流經中營頭屯地南塔勒奇頭屯地北果子溝水來滙是爲磨河天山客話云綏定河出墨花魚余訪土人蓋磨河所產是曰磨河魚音訛墨花也磨河又南流經破城東破城在塔勒奇城正北五里許垣墉之跡已不可辨而劓地者多得明珠瑟瑟之屬余特往遊見荷鍤者踵趾相接殘甃斷瓦五色瑠璃布散徑路有得碎瑪瑙者上縷細字近於回部書文獻無徵莫知其

由磨河折而西經塔勒奇城西北瀦水爲水磨又南流經皇渠西斷坡
曲岸細柳新蒲小渚潌回自成幽境又南三里許積爲小湖周可里許

臨湖西岸故江南鹽巡道朱爾賡額字白泉詩人築戍館於此名曰且

園園中有樓曰面面山樓余集陶淵明庾子山句爲樓楹聯曰方宅十餘畝草屋八九間榆柳兩三行梨桃百餘樹

果樹榆柳可百餘株圃中裂畦布種鶯粟繁如雲錦余嘗信宿茲園壺

觴負日夕陽西下散步水濱鳧雁鴛鴦衝烟拍水有細魚四腮如鱸湖

流舉網藉艸以觀磨河又南流溉戶民田餘水滙伊犁河烏里雅蘇圖

西支水南流經東十戶地之東又南流經塔勒奇草湖西溉塔勒奇頭

屯田又南流爲頭道河滙於伊犁河頭道河東去塔勒奇城十里塔勒

奇城西北五里有草湖周十餘里諺曰亂泉子當破城之西烏里雅蘇

圖西支水之東湖中湧泉引以南流爲皇渠亦溉塔勒奇頭屯田又南

西域水道記卷四

午貫磨河蓋剗木爲長槽架於磨河水南北接渠口使水由槽中行

不與磨河亂土人謂之橙槽余檢薛居正舊五代史有橙槽門是知其

法舊矣渠水南流二十餘里經大榆樹莊東又南流阻沙山折而東流

疏爲支渠西溉惠遠城正紅旗屯東溉鑲紅旗屯而止

又西莫霍圖河注之

果子溝西十五里曰大東溝又西十里曰小東溝又西二十里曰小西

溝又西五里曰苜蓿溝又西五里曰大西溝小東苜蓿二谷中各有客

民一戶田諸溝水皆南流惟小東溝水達山外溉戶屯而止四谷之水

各南流溉左營三屯田而滙是爲莫霍圖河凡塞水濫觴谷中大氏雪

汁也魏崔浩之駁李順曰雪之消釋僅能斂塵不得通渠溉灌浩之耳

聞固不如目見矣莫霍圖河南流復分爲三支西支經右營二屯地而

南中支經右營頭屯地又南經西十戶地之西又南左右各匯一泉又南流與西支匯東支南至瞻德城東門外有泉來匯瞻德城者地曰察罕烏蘇乾隆二十五年阿公桂疏定伊犁建置事宜云伊犁田地肥沃無過察罕烏蘇可建一小城以遏哈薩克布魯特由伊犁河北來往之路是也築城議久寢至四十五年伊公勒圖始建城高一丈三尺周三里六分門三東升瀛西履平南延景屯鎮右營駐之東距廣仁城二十里西南距拱宸城七十里大東溝水既匯其城東泉南溉右營頭屯田凡十餘里而與中西二支匯三水既同是爲二道河東距頭道河十里黏天白草環帶葭薄雉兔之所潛匿每歲孟冬將軍校獵自頭道河至三道河止謂之小圍甲戌之歲稷雪初飛木葉盡脫朱白泉邀余射獵嗾犬呼鷹豪氣百倍二道河又南流入於伊犁河

西域水道記卷四

三

又西察罕烏蘇河注之

大西溝之西二十餘里曰察罕烏蘇溝塔勒奇山至察罕烏蘇溝而盡察罕烏蘇水自溝南流分爲東西二支每支又各分爲二四水南流復匯爲二惟東第一支有泉自西匯之東支南流是爲三道河西支南流是爲花牆爾水皆入伊犁河花牆爾水東距三道河十餘里三道河東距二道河二十里東支所經者右營二屯地西支所經者右營三屯地兩支之間右營四屯地乾隆二十年定邊左副將軍阿睦爾撒納奏言傳聞哈薩克至伊犁將回衆所種穀麥搶去現在察罕烏蘇之伯勒齊

爾蒙古語伯勒齊爾水合流處也居住卽此水匯流處也亦曰古爾班察罕烏蘇二十

八年入秩祀

文曰惟神敷澤遐方分流絕微波心澄澈鋪一片之白銀天色空明映千層之素練沃野則霍集格爾繡壤毗連遠

峯則哈喇古顏翠屏環抱湖源有自利涉攸資朕統馭八紘宣昭七德設堠流沙以外載拓堯封洗兵瀚海之西遠恢周索神効靈以俟應天

助順而成功惟茲察罕之川近在伊犁之域當王師之度漠相予宏勳
泊都護之屯田溥茲美利土膏滋液應坎德以濟生民水氣和甘徧兌
方而宣渥惠爰稽典故載肅常禋奠玉幣以孔虔秩春秋以致告吉蠲
將事列四瀆之崇班肝蠶丕昭錫千秋之繁祉庶希鑒格永祚塞垣

又西過拱宸城南和爾郭斯河注之

察罕烏蘇溝西三十里為阿里瑪圖溝山皆平阜與塔勒奇嶺相屬水

達谷外南流漑回屯田又南經正白旗達呼爾營東又南至一間房地

而止是為西阿里瑪圖元史載畏兀兒地第二十九阿力麻里即阿里

瑪圖之異文也阿力麻里亦曰葉密里耶律希亮傳作葉密里憲宗紀
作葉密立脫力世官傳作渴密

里初為定宗潛邸湯沐邑後為定宗子宗王火忽分地見耶律希亮傳

元太祖先定東土故太祖諸弟多封於東今內扎薩克中之四十五旗
是也至太宗以下子孫則多封於西故阿力麻里為定宗子分地海都

篤娃得分據金山南北也或以為諸王海都分地非也阿力麻里為海
元史謂之東諸侯西諸侯

志然考之月亦察兒傳海都分地近金山地理志疑誤地理志又言阿
力麻里在北庭之西北四五千里世祖紀復言阿力麻里地在和林北

西域水道記卷四

三

按元之和林在今喀爾喀三音諾顏之東界阿力麻里當和林之西南
其去北庭亦僅三千餘里蓋作史者不審地里語出臆度不足為據

至元五年海都叛舉兵南來世祖逆敗之於北庭又追至阿力麻里則

又遠遁二千餘里上令勿追以皇子北平王南木合建幕庭於阿力麻

里鎮之十四年八月諸王昔里吉與脫脫木兒句雙木忽兒句撒里蠻

等劫北平王械繫右丞相安童以叛使通好於海都海都弗納撒里蠻

亦悔過執昔里吉等北平王遣札刺忽以聞二十一年三月北平王歸

自阿力麻里安童繼至蓋海都分地在金山西南當阿力麻里之北昔

班傳云海都叛世祖命昔班諭之海都聽命退軍置驛而丞相安童軍

先已克火和大王部曲盡獲其輜重海都懼火和大王即宗王火忽海

都地鄰火和懼安童乘破竹之勢侵軼彼疆激而作亂西北諸王自此

不靖垂五十年是則安童實為戎首元史無海都諸王傳安童傳復深

爲之諱訪古料今足明始末地舊有城城北有關元劉郁西使記云西南行二十里有關曰鐵木兒懺察守關者皆漢民關徑崎嶇似棧道出關至阿里麻里城市井皆流水交貫有諸果惟瓜蒲萄石榴最佳回紇與漢民雜居其俗漸染頗似中國又長春真人西遊記云辛巳九月二十七日至阿里馬城鋪速滿國王暨蒙古塔刺忽只按卽達魯花赤領諸部人來迎宿於西果園土人呼果爲阿里馬蓋多果實以是名其城其地出帛曰禿鹿麻所謂種羊毛織成者長春之歸自行在也於壬午四月五日

西域水道記卷四

三

回部王吐呼魯克吐木勒罕墓西回人庫魯安書云其部初有女子曰阿郎固庫勒魯者天帝使一丈夫向女吹噓白氣感而有身生子曰麻木哈伊項爲回部王傳至三世習蒙古法又傳十四世爲吐呼魯克吐木勒罕年二十二嗣爲國主後二歲獵於阿克蘇遇回人授派噶木巴爾法返伊犁又有回民七人者來教其部衆遂盡返舊俗在位十年卒有滿克國回部長以橐駝四十負滿克國土爲建此塚覆以碧琉璃刻墓門識營造之年至今嘉慶二十五年凡四百七十四年推以彼術三十年積一萬六百三十一日則四百七十四年當積一十六萬七千九百六十九日又十分日之八以歲實約之得四百五十九年又三百二十三日太半日從今庚辰逆數之蓋建於元順帝至正二十年庚子歲也墓旁土中多金銀銅三種錢皆無輪廓肉好面幕有字不可識銅錢

至薄大如宋當百錢銀錢至小如王莽直一而稍厚金錢薄如銅錢大如開通元寶錢科河經墓西

西南距拱宸城二十餘里

分二支左支經鑲白旗達呼

爾營東東距阿里瑪圖河二十里右支經鑲白旗達呼爾營西達呼爾者索倫部之右翼也謹按一統志云索倫達呼爾二部居額爾古納河及淨溪里江之地與羅刹接境自順治五年其佐領阿濟布入貢始內屬駐牧黑龍江乾隆二十九年移其部官兵千十八人駐伊犁置領隊一人轄之左翼四旗逐水草爲索倫在奎屯河撒瑪勒河岸右翼四旗廬舍居爲達呼爾在和爾郭斯河科河岸科河左支經達呼爾營而止右支經達呼爾營至拱宸城東二十里其處架橋往來所渡也又南流溉戶田而止拱宸城者卽和爾郭斯城也乾隆四十五年將軍伊公勒圖建在塔勒奇城西八十里城高一丈七尺周三里七分門三東寅暉

西域水道記卷四

三

西遵樂南綏定屯鎮參將駐之是年置巡檢一人城西二十餘里爲和爾郭斯河發自北境松山南流左疏渠一溉營屯二工田潴爲水磨右疏渠一溉營屯三工四工田和爾郭斯河又南流左疏渠一渠東南流經拱宸城西分爲二支東支經正藍旗達呼爾營東西支經鑲黃旗達呼爾營西兩營之北沙山中湧泉滙爲淖爾周十餘里萑葦叢生豪豬所聚也

在拱宸城西南五十里

西支渠經淖爾而止東支渠經淖爾又南分爲二

支左支溉正藍旗達呼爾田右支溉鑲黃旗達呼爾田至沙山而伏乾隆二十一年定西將軍策凌奏言扎薩克鄂諾錫告稱阿睦爾撒納掠伊游牧伊卽至和爾郭斯正值哨探大兵遂與諾爾布等會合占據津梁阿睦爾撒納不能渡河依沙岡自守卽此沙山也和爾郭斯河又南流經拱宸城西和爾郭斯安達拉卡倫東是爲渡口乾隆二十三年大

兵剿厄魯特餘黨布庫察罕聞大兵至越塔勒奇與哈薩克錫喇會策
布登扎布追至和爾郭斯河即奪渡過河賊已遷移游牧山上餘衆不
多官兵四百餘名前進忽伏賊千餘突出官軍分爲三奮力迎射格鬥
良久賊始奔潰和爾郭斯河又南流右溉鑲黃正藍二旗達呼爾田又
南流入伊犁河乾隆二十八年入秩祀文曰維神德配元冥位居兌澤
播土膏之沃衍利濟咸昭潤絕
域之奧區盈科有漸達洪波而遠邁直接伊犁匯衆派以支分近聯車
集湖靈源之溥博錫祀典以輝煌朕康乂西陲蕩平朔漠翦準噶爾之
餘孽勢失負隅倖渥赅特於重圍計窮飛渡惟神功之設險乃小醜之
削平穹廬傳鶴唳而先驚逆酋亡命士馬挾風濤而俱迅王旅奮威久
修典禮於祠官用薦馨香於
望秩尙其昭鑒將以苾芬

又西都爾伯勒津喀喇烏蘇注之

和爾郭斯河西六十里爲車集河源源發自北山南流經正黃旗索倫
界東而伏河之委東距和爾郭斯八十里與和爾郭斯河同入秩祀文曰

西域水道記卷四

重

惟神導源西極疏派北庭抱巖谷以奔趨莫禦激湍之勢溉土田而行
沃聿宏潤物之施細浪翻銀脈絡遙連乎察罕長虹飲練尾閭下注乎
伊犁禹迹未通靈境軼大荒經外堯封新拓嘉名補王會圖中朕撫育
寰區牧宰邊徼武功丕振全收葱嶺之河屯政肇修遠引蒲昌之海惟
名川之用涉宜昭報之有功承坤德以流甘位兌維而布潤往歲六軍
飲馬式彰呵護之靈今茲重譯款關胥受懷柔之化爰崇明祀特敕所
司陳璋邸以升馨潔彝尊以致告澄波淼淼永環都護
之城流水泱泱遙繞祁連之嶂益甄靈貺尙鑒精誠

車集河西四十

里爲齊齊罕河源源發自北山南流東疏渠一又南流東西各疏渠一
東渠南經齊齊罕安達拉卡倫西止不流西渠南經正紅旗索倫界西
止不流乾隆二十三年定邊將軍兆公惠奏言策布登扎布在和爾郭
斯擊敗賊衆臣卽晝夜前追賊人蹤跡四散侍衛老格在齊齊罕河剿
賊百餘人河又南流而伏河之委東距車集河二十里齊齊罕河西三
十里爲撒瑪勒河源源亦發自北山谷長百里流泚涓涓當暑清涼草
深沒馬水出谷南流經鑲紅旗索倫界東東距齊齊罕河十五里乾隆

二十三年參贊富公德敗哈薩克錫喇於博羅呼濟爾嶺哈薩克錫喇
自撒瑪勒河向伊犁逃去河又南流達葦蕩撒瑪勒河西十里爲奎屯
河自北山南流入夏暴漲涉者往往滅頂南流達葦蕩葦蕩者卽撒瑪
勒奎屯所鍾之澤東西百八十餘里南北八十餘里是曰都爾伯勒津
喀喇烏蘇澤中洲方四五十里有隴畝遺跡澤南薄沙山山外卽伊犁
大河都爾伯勒津喀喇烏蘇於南面溢水穿沙山斷處入伊犁河乾隆
二十八年秩祀撒瑪勒奎屯二河祭撒瑪勒河文曰惟神靈源夙著渥
澤常濡居額蘇克之上游行伊犁河
之別派遙岑北拱萬疊雲連大水南環千條練瀉巨神皋而利濟滋絕
域以含膏莫彼迴瀾昭茲秩祀朕誕敷文德式廓輿圖輯部落於荒陬
功惟作潤軫羣黎之日用期以飲河惟坎功之用涉咸昭斯戊校之開
屯有藉遣專官以致享典肅春秋酬靈貺而告虔吉諏辛甲奎屯上下
益恢聲教之隆車集東西共受明禋之賜神其昭鑒薦此椒馨祭奎屯
河文曰惟神衍派天山導源月窟湛然無滓性殊湯谷之温注焉不盈
德比寒泉之食波成紋而曲折下注伊犁水如鏡以澄明近鄰車集功
惟潤下勢欲朝宗洵神應之聿昭宜吉蠲之罔替朕并包九宇戡定二

西域水道記卷四

美

庭路逾弱水之西壬鈐遠授地盡河源之外戊校新屯乃谷都護之臣
肇舉名川之祀穿渠引水灌溉之利攸資剡木乘桴濟涉之功尤遠自
古販章未闢不登裴矩之圖於今中外爲家合補酈元之注清醪載酌
制帛爰陳康我塞垣永作渠搜之襟帶昭茲功德長歆嗣歲之馨香式
薦苾芬庶希鑒格奎屯河西三十里爲圖爾根河源源發自都蘭哈喇山東流

折而南達山外南流二十餘里經齊齊罕卡倫西又南二十里經和爾
郭斯卡倫西又南經鑲藍旗索倫界西其流處東距奎屯河二十里又
南達小葦蕩小葦蕩東西七八里南北十許里在都爾伯勒津喀喇烏
蘇西北二十餘里

又西喀喇河注之

自齊齊罕卡倫傍圖爾根河北行踰河東岸小山梁凡三十里至奎屯
卡倫乃西北行經圖爾根河源北岸山陰凡三十里至博羅呼濟爾卡
倫又西南行經都蘭哈喇山陰一百二十里至山之西麓爲崆郭羅鄂

倫卡倫卡倫南距伊犁河八十里索倫界至此止卡倫外則哈薩克境也崆郭羅鄂

倫卡倫西北四十里有洮賴圖水發自北山南流又西五十里有喀喇

河發自庫隴奎山準語庫隴奎寒也山徑多寒故名舊作庫隴癸東麓乾隆二

十三年定邊將軍兆公惠奏言臣等於三月十五日據侍衛占丕納報

稱行至哈套蒙古語哈套堅也山多堅石故名晚見烟火移入庫隴奎山口隨捉生詢

問知布庫察罕敗逃後有喀喇沁宰桑恩克圖句多果魯特宰桑布圖

庫句噶勒雜特宰桑特克勒德克句阿勒塔沁宰桑塔爾巴等領二百

餘戶欲渡伊犁有伊等游騎探知大兵已至遂移往庫隴奎山險藏匿

臣兆惠巴祿色布騰巴爾珠爾溫布領兵一百人入庫隴奎山口策布

登扎布領兵一百名過阿勒坦額墨勒與富德羅卜藏多爾濟鄂博什

從後掩擊臣兆惠伏兵山背於五鼓直前掩襲行未二里抵賊游牧我

西域水道記卷四

兵卽呼噪叢射賊衆驚竄值大霧迷漫賊棄其帳房器物赤身乘馬逃

據山嶺放鎗滾石相拒我兵奮前攻擊侍讀學士職銜溫福副將高天

喜各攜一礮奔赴高山擊殺山上賊衆色布騰巴爾珠爾得鳥鎗傷鉛

子從腋透出因達什策凌應援得脫藍翎侍衛伍岱射恩克圖直貫其

項獲之阿勒坦額墨勒者卽阿勒坦額墨勒都圖山也喀喇河南流左

匯洮賴圖水西南流五十里有塔奇爾罕布拉克水由北來匯又西南

六十里經阿勒坦額墨勒都圖山陽其山水由北來匯乾隆二十八年

祀阿勒坦額墨勒都圖山文曰惟神鎮定邊隅莫寧朔漠東接格登之險疊嶂峇堯南通莎嶺之雄堆雲峭崿坤元

叶吉色偏應乎乾金艮止常安位乃居於坎水洵伊犁之保鄣宜禋祀之優崇朕撫卹準夷綏來蕃部自古職方有典未服懷柔於今王會新

圖如親刊旅惟茲山之雄峙爲絕域之殊觀襟帶環流束銀濤於車集屏藩拱列連碧巘之和羅特詔祠官用頒制帛牲牢具備遙申徧望之

誠俎豆維馨永著庥縣之典神其來格鑒此明禋喀喇河匯阿勒坦額墨勒都圖山水復西南

流二三十里經薩爾塔罕山東折而東南流數十里入於河
又西察林河從南來注之

格登山北八十里之達布遜淖爾周數十里淖爾南曰畢爾巴什山其
東曰伊什噶爾迪山其西曰巴彥聚爾坤山環淖爾三面淖爾之東北
曰珠爾根察奇爾有泉發焉西流經淖爾北是為鹽池口水又西流經
鉛廠南乾隆三十一年將軍明公瑞始置鉛廠於雅瑪圖嶺歲採鉛六
七千觔至萬餘觔運寶伊局之餘為軍火鉛九六十年將軍保公寧以
出鉛漸少移廠於厄魯特游牧察奇爾山陽即今廠也山之北麓有城
寺遺址鉛廠南行五十里至鹽池口水北岸鹽池口水又西流數十里
沙喇雅斯水由南來滙水發自沙喇雅斯嶺納木扎勒齊素隴傳云
布乾隆二十年納木扎勒齊素隴偕同部貝子車布登扎布等追達瓦
附

西域水道記卷四

三

齊至沙喇雅斯嶺是也嶺在冰嶺西與特克斯河源相近水達山外北

流經沙喇雅斯卡倫東

卡倫東南至特克斯塞沁卡倫七十里

又北流經鄂爾果珠勒山

東山有水來滙山之西置卡倫

鄂爾果珠勒卡倫東南距沙喇雅斯卡倫六十里

通善塔斯嶺

也鄂爾果珠勒水東流滙沙喇雅斯沙喇雅斯挾以北流達鹽池口水

鹽池口水西流四五十里經格根卡倫北

格根明也見元史語解格根卡倫東南距鄂爾果珠勒卡

倫七

十里是為格根河又西流四十餘里哈爾奇喇水來滙水發自鄂爾果

珠勒山南五十餘里西北流經哈爾奇喇卡倫北

卡倫東距沙喇雅斯卡倫七十里

又

西北流南滙尼楚衮哈爾奇喇水折而北流經齊齊罕圖小卡倫東

東距

格根卡倫六十里

滙於格根河格根及哈爾奇喇水側嚮為東布魯特牧地準

噶爾侵軼故西遷焉格根河西北流四十里經哈爾罕圖小卡倫東

東南

距齊齊罕圖小卡倫五十里

有古爾班伯爾克水由西南來滙格根河又西北流經

扎拉圖卡倫西

南至哈爾罕圖小卡倫六十里

又西北流五十里經額爾格圖卡倫西

折而東北流四十里經鄂博圖卡倫西又折而東流五十里經雅巴鄂爾圖卡倫北有雅巴爾布拉克水經卡倫東來匯格根河又東流六十里有特穆爾里克河由南來匯特穆爾里克河發自察奇爾山陰西北流經特穆爾里克卡倫北折而北流九十里匯於格根河二河匯處置渡口卡倫焉惟格根時涸無水河經卡倫復東北流是爲察林河凡四里至察林渡口乾隆二十三年定邊將軍兆公惠奏言昂吉岱自去年從阿圭雅斯逃至沙喇伯勒哈薩克錫喇句鄂哲特等以昂吉岱係噶勒丹策凌近族議立爲大台吉布庫察罕與舍楞不從舍楞欲入俄羅斯布庫察罕拒守伊遜薩們之源昂吉岱遣鄂哲特攻之爲所敗時又有哈薩克哈布哈之子圖古占領兵二千掠沙喇伯勒昂吉岱於察

西域水道記卷四

三

林之橋渡連兵拒戰卽此渡口也渡口東北五十里爲特勒克卡倫察林河至卡倫南分爲二東支爲伊克喀喇烏蘇西支爲察林經卡倫左右入伊犁河長春真人西遊記云自阿里馬城西行四日至荅刺速沒輦水勢深濶抵西北流從東來截斷陰山河南復是雪山十月二日乘舟以濟元時譯語謂河爲沒輦荅刺速沒輦卽伊犁河也長春真人之歸也於阿里馬城西百餘里濟大河往時所濟在察林渡西歸時則在察林渡東伊犁河自惠遠城南西流九十里逕古爾班托海北又西七十里逕安達拉卡倫北又西六十里逕察罕托海北又西七十里逕額林賴圖卡倫北又西八十里逕沙喇托羅海卡倫北又西八十里逕額林摩多卡倫北又西六十里至特勒克卡倫北蓋察林伊犁交流處距惠遠城五百一十里

又西北車里克河注之

伊犁河既會察林西北流百里而近逕托博羅爾山南又西北流逕布喀嶺北凡百餘里車里克河自南來入之河發自特穆爾圖淖爾北境山東流南滙六水凡二百里將折而北有圖爾愛科爾山水由東南來滙又北流二十餘里至察里克巴克圖托海之西有庫克里克山水流百四十里由正西來滙又北流二十餘里有阿蘇嶺水流百里由正西來滙是爲車里克河又北流百八十餘里經布喀嶺西入伊犁河

又西北古爾班奇布達爾水注之

車里克河西三十餘里有塔拉圖布拉克水又西四十餘里有古爾班沙扎海水皆北流數十里而止又西十餘里爲古爾班奇布達爾水源當阿蘇嶺之北凡北流百七十餘里入伊犁河伊犁河自車里克河口

西域水道記卷四

旱

逕沙喇伯勒境北凡西流百一十里與古爾班奇布達爾水會沙喇伯勒者舊杜爾伯特地杜爾伯特部傳云有伯什阿噶什者伊斯扎布之曾孫也祖扎勒父車凌多爾濟句伯什阿噶什兄曰布達扎卜曰達瓦克什克弟曰達瓦濟特曰格咱巴克聚牧伊犁河西沙喇伯勒境鄰哈薩克牧達瓦齊虐其衆伯什阿噶什將棄之懼襲而寢大軍征達瓦齊抵伊犁班第遣使招因獻籍三千餘戶降是其事也額敏和卓傳云先是議以額敏和卓從定邊將軍兆惠赴沙喇伯勒剿厄魯特逸賊次及回逆尋議分道進兵額敏和卓奏自沙喇伯勒取道巴達勒至喀什噶爾取道木素爾嶺下阿克蘇徑皆險別有間道臣遣使赴兆惠軍爲導蓋沙喇伯勒之南通特穆爾圖淖爾傍淖爾南行越巴爾琿嶺渡納林河可至喀什噶爾

又西北圖爾根水注之

圖爾根水凡北流二百里入伊犁河源處東距古爾班奇布達爾水五十里入河處相距二十餘里

又西北塔爾噶爾水注之

塔爾噶爾水發源東北流百六十餘里有伊西克圖水由南來匯同北流百三十里入伊犁河東距圖爾根水二十餘里

又西北古爾班阿里瑪圖水注之

阿里瑪圖三源並發流五十里而匯又東北流八十里又北流百四十餘里入伊犁河入河處東距塔爾噶爾水二十餘里方略載噶勒丹策凌令其妹夫羅卜藏車凌率兵一萬駐阿里瑪圖沙喇伯勒以防哈薩克又云乾隆二十八年伊犁辦事伊公勒圖奏查哈薩克兩路分巡南

西域水道記卷四

望

路自特穆爾圖淖爾之南由巴爾坤嶺至塔拉斯吹地方北路沿伊犁河由古爾班阿里瑪圖至沙喇伯勒地方方能同徧是其地矣

又西北喀什柯楞水注之

喀什柯楞水二源並發而匯東北流七十餘里又北流百六十里入伊犁河入河處東距阿里瑪圖水二十餘里

又西北庫魯圖水注之

庫魯圖水發源東流七十餘里有奎屯水由西南來匯之又東流二十里有察拉爾罕水由西南來匯之庫魯圖水折而東北流五十餘里又北流一百二十里入伊犁河入河處東距喀什柯楞水二十餘里

又西北喀什塔克水注之

喀什塔克水發源東北流百五十里又北流百六十里入伊犁河入河

處東距庫魯圖水四十餘里伊犁河自車里克河至哈什塔克水凡三百里河之北岸皆沙磧也

又西北注巴勒喀什淖爾

伊犁河自哈什塔克河口北流百里入於淖爾西域圖志云淖爾爲西北境最大澤左右支河水淺可渡處有五曰額蘇斯德曰喀喇塔拉曰輝邁拉圖曰温托爾格曰塔爾輝塔統名曰多歡多歡者渡口也

渡口曰多歡蒙古語則曰鄂羅木見元史語解

淖爾一源爲庫克烏蘇河

庫克烏蘇河源出博羅呼濟爾嶺流峽中逕其卡倫一水西流自卡倫北來會是爲博羅呼濟爾水車布登扎布傳云乾隆二十四年車布登扎布赴特穆爾圖淖爾協剿霍集占會將軍兆惠已率兵進葉爾羌車

西域水道記卷四

四

布登扎布由博羅呼濟爾還駐伊犁卽其境也博羅呼濟爾水西北流八十餘里有小水亦曰庫克烏蘇由北來滙之又西北流六十里有庫克鄂羅木水由北來滙之其水盛於庫克烏蘇故博羅呼濟爾受之其流益大是爲納林河納林河西北流八十里有噶克察摩多水自北來入之又西北流六十里有喀喇塔拉水自北來入之南北山勢至斯而隘納林河逕峽中束急而怒流如竹箭西北流數十里出峽南山漸舒河傍北山流逕喀喇塔拉山口之南是爲庫克烏蘇河勢猶洶湧未就安流乾隆二十三年定邊將軍兆公惠奏言富德聞哈薩克錫喇晝夜逃奔之信領兵二百越博羅呼濟爾嶺分爲兩隊追及於哈魯勒托羅海獲卓托魯克得木齊車隆旋遣參領納旺等持托忒字印文往招布庫察罕令檢哈薩克錫喇自效行至庫克烏蘇納旺布庫察罕之喇嘛

來見庫克烏蘇河又西北流三四十里逕察罕博胡圖境北又西北十餘里逕莫爾霍必濟境北又西北流三十餘里逕莫軌圖境東有碩津烏蘇河自南來入之碩津烏蘇發源伊犁河北岸山北流經阿勒坦額墨勒都圖山西東匯古爾班胡蘇圖水又北流經塔蘭胡圖克境東與庫克烏蘇河匯庫克烏蘇河又北流百五十餘里逕察陳喀喇境西而入淖爾西距伊犁河入淖爾處三百八十餘里

一源爲勒布什河

自庫克烏蘇河所逕之喀喇塔拉山北行五十餘里爲扣肯布拉克山其山北向如張兩股正中一泉滂然有女陰之象故謂之扣肯也

蒙古語謂

女子爲扣肯登山梁西北望蒼茫鬱蒸銀濤一線卽巴勒喀什淖爾也伊犁

河北岸之山層岡疊阜至此始出北山東西數百里山皆截然而止山

西域水道記卷四

三

下北眺平沙浩渺不知其極遠樹成林則會勒布什諸水所經之地扣肯布拉克水北流數十里而伏扣肯布拉克東五十里爲喀喇哲克德水水發自雅瑪圖之北達山外北流滌洄爲葦蕩中多豪豬喀喇哲克德水東五十里爲哈畢爾罕布拉克水涓涓北流遇沙而伏哈畢爾罕布拉克之東亂流五水三百一十里至勒布什河河出薩爾巴克圖河北岸庫克托木嶺之陰其陽卽庫克托木水所發也勒布什河西北流百三十餘里有巴什罕河由南來匯勒布什河西六十里有莫霍圖水北流而止不與河通莫霍圖西六十里爲巴什罕河又西六十里爲薩爾罕河又西三十里爲博木察罕烏蘇河又西四十里爲察罕烏蘇河皆北流入於勒布什河察罕烏蘇河之西六十里卽哈畢爾罕布拉克水也勒布什西北流旣會諸水又西北流二百五十餘里逕阿爾噶凌

圖境西察陳喀喇境東入淖爾西距庫克烏蘇入淖爾處一百里沙喇扣肯傳云乾隆二十一年阿睦爾撒納竄哈薩克巴圖爾烏巴什覬據伊犁聞我師有備竄察罕烏蘇博羅布爾噶蘇阿勒坦特卜什勒布什薩爾罕諸境卽此諸水所經也伊犁與塔爾巴哈台每秋各以領隊一人巡哈薩克境以勒布什河爲界河東爲塔爾巴哈台境西爲伊犁境一源爲愛唐蘇河

愛唐蘇河源出塔爾巴哈台庫圖爾嶺西西流二百里有愛古斯河自北來入之愛古斯河發自朱爾庫山

準語朱爾母狍也庫朱類也山形似之故名

西流一

百五十餘里有博羅額布克特水烏蘭額布克特水同西南流百餘里來滙愛古斯河又挾以西南流五十里入愛唐蘇河愛古斯河東距塔爾巴哈台城四百餘里與哈薩克以此河爲界也愛唐蘇河西流三十

西域水道記卷四

器

餘里有水發自哈薩克界阿爾會西里山東凡南流二百里經庫克薩爾境東來滙愛唐蘇河又西流四十餘里有水發自阿爾會西里山西亦南流二百里經庫克薩爾境西來滙愛唐蘇河又西北流五十餘里入淖爾傍愛唐蘇河皆哈薩克游牧其地爲漢康居國逐水草冬夏徙居而以塔什罕城爲宗國是卽漢書所謂康居隨畜移徙其王冬治樂越慝地夏居蕃內也塔什罕城在哈薩克西乾隆初霍罕伯克額爾德呢取塔什罕城哈薩克左部汗阿布賚與右部王阿布勒必斯攻霍罕復塔什罕城三十二年阿布賚遣都拉特柯勒奉表至伊犁乞師二萬人並假大礮將大舉伐霍罕將軍不許其後霍罕仍取塔什罕城焉元

史每言阿速與欽察爲鄰疑阿速卽哈薩克

元史言欽察阿速諸國速不台傳與曷思麥里傳互

異速不台傳云收欽察境又至阿里吉河與斡羅思部大小密赤思老遇一戰降之略阿速部而還是先欽察而斡羅思而阿速也曷思麥里

傳云太祖命曷思麥里從哲伯為先鋒攻乃蠻克之斬其主曲出律帝親征至薛迷思干追其主札刺丁至慙顏城西塞札刺丁逃入於海取玉兒谷德痕兩城繼而慙顏城亦下帝遣使趣哲伯疾馳以討欽察命曷思麥里招諭曲兒忒失灣兒沙等城悉降至谷兒只部及阿速部以兵拒敵皆戰敗之招降黑林城進擊幹羅思於鐵兒山克之獲其國主密只思臘哲伯命曷思麥里獻諸朮赤太子誅之尋征康里至孛子八里城與其主霍脫恩罕戰又敗其軍進至欽察亦平之是曷思麥里由西域轉戰而北先阿速而幹羅思而康里而後欽察也然曷思麥里傳先言帝趣哲伯疾馳以討欽察則征欽察究在先曷思麥里徇西域諸城而北先至阿速則阿速在欽察之南阿速與哈薩克音亦相近也

哈薩克部凡三日左部亦曰東部右部亦曰中部西部左部置汗一今日幹

里始歸順之汗阿布賚子也乾隆四十七年嗣其所轄衛遜諸鄂拓克

附崆郭羅鄂倫及鄂爾果珠勒卡倫在伊犁西素宛鄂拓克附沁達蘭

卡倫在伊犁北為最近阿塔海瑚蘭素諸鄂拓克去伊犁為遠右部置

汗一今日托霍木始歸順之汗阿布勒班畢特孫也嘉慶十四年嗣又

置王一今日江霍卓阿布勒班畢特曾孫阿布勒班畢特之長子曰博羅特嗣為汗其次子曰阿布

西域水道記卷四

勒必斯別爵為王有西部台吉巴喇克者生子杭霍卓而卒巴喇克之妻改適阿布勒必斯因以杭霍卓為養子 朝廷命之嗣王爵江霍卓

則杭霍卓子也嘉慶五年嗣所轄色密斯奈曼及斯班奈曼諸鄂拓克皆附塔

爾巴哈台北西部處極西按土爾扈特部傳云土爾扈特屯牧額濟勒河所居地曰瑪努托海北界俄羅斯南界哈

薩克東界哈喇哈爾西界圖里雅斯科是哈薩克已近西海蓋即西部也無汗王惟置二品以下台吉其

台吉托克托庫楚克所轄者曰喀喇拜吉格特鄂拓克佳拜所轄者曰

克勒拜吉格特鄂拓克乾隆三十七年伊犁將軍舒公赫德疏言哈薩

克內有伊克準多木達準巴罕準蒙古語巴罕略小之謂三部伊克準即衛遜鄂

拓克向無頭人阿布賚博羅特阿布勒必斯兼轄之多木達準即奈曼

色密斯奈曼斯班奈曼總名曰奈曼鄂拓克阿爾呼勒兩鄂拓克巴罕準即阿勒沁鄂拓克

考疏所言伊克為左部多木達為右部巴罕為西部矣愛唐蘇河所逕

為右部地羅卜藏多爾濟傳云乾隆二十二年羅卜藏多爾濟偵阿睦

爾撒納由博羅塔拉走阿卜克特偕副都統愛隆阿等分道馳擊抵塔爾巴哈台謀輝特逆賊巴雅爾伏嶺險捕之賊遁尾六日次愛唐蘇哈薩克兵二百餘遮道羅卜藏多爾濟僅數騎麀擊之哈薩克懼乞降卽此河之側也入淖爾處西南距勒布什河六十餘里

皆注於淖爾

巴勒喀什淖爾東西長八百餘里南北廣處二百餘里狹處百餘里極四十五度五分至八分西三十六度五分至三十七度四分蒙古語巴勒喀什寬廣之意言其能納衆流也淖爾中有三島在東者曰瑪呢圖噶圖爾罕在西者曰察罕托海噶圖爾罕中曰阿拉克罕伊犁河入處當察罕托海噶圖爾罕之南庫克烏蘇勒布什河入處當瑪呢圖噶圖爾罕東南愛唐蘇河入處當瑪呢圖噶圖爾罕之東元史速不台傳乙

西域水道記卷四

吳

未太宗命諸王拔都西征八赤蠻速不台爲先鋒虜八赤蠻妻子於寬田吉思海八赤蠻逃入海中地理志歲丁酉師至寬田吉思海有欽父酋長八赤蠻逃避海島中或以寬田吉思海中有山疑卽巴勒喀什按西北邊淖爾中有島者非一塔爾巴哈台之西巴爾噶什淖爾巴爾噶什之東北千餘里有慈謨斯夸淖爾慈謨斯夸之西北九千里有額納噶淖爾其中皆有島速不台傳云討欽察引兵繞寬定吉思海展轉至太和嶺元之太和嶺有二一在欽察境一在大同土土哈傳云欽察去中國三萬餘里夏夜極短日暫沒卽出地理志西北地附錄欽察屬月

祖伯分地


朮赤傳朮赤者太祖長子也國初以親王分封西北其地極遠去京師數萬里驛騎急行二百餘日方達京師朮赤薨子

拔都嗣拔都薨弟撒里答嗣撒里答薨弟忙哥帖木兒嗣忙哥帖木兒薨弟脫脫忙哥嗣脫脫忙哥薨弟脫脫嗣脫脫薨弟伯忽嗣伯忽薨弟月卽別嗣蓋自後部落遂以月卽別爲號月卽別卽月祖伯也以道里計之額納噶足當寬田吉思之


日於巴勒噶什無所致疑沿淖爾皆沙磧西域聞見錄紀土爾扈特歸
 順事略曰乾隆三十五年十月二十三日土爾扈特汗渥巴錫自俄羅
 斯之額濟勒河起程既入中國乃由巴勒喀什淖爾進其間經過之戈
 壁五日雖有水泉寸草不生行至慶吉斯察罕在奈曼鄂拓克江霍卓
 勒齊等及阿布勒必斯之子卓哈薩克汗原書作阿布賚及阿布勒必斯阿布勒班畢特與之
 戰又有台吉額勒里納拉里要劫之相持二十餘日向沙喇伯勒而進
 至沙喇伯勒南界布魯特聚集十餘萬騎星飛雲擁渥巴錫避入沙喇
 伯勒北界而千餘里戈壁無滴水寸草時際三月天氣溫暖人皆取馬
 牛之血而飲瘟疫大作死者三十萬人牲畜十存三四經十餘日狼狽
 逃出足明淖爾岸大磧矣

西域水道記卷四

巴勒喀什淖爾所
 受水第一圖
每方
百里




北




西域水道記卷四

四




南

巴勒喀什淖爾
所受水第二圖



特穆爾
圖淖爾

西域水道記卷四



北

巴勒喀什淖爾
所受水第三圖

西域水道記卷四

五十一

阿拉克罕

察罕
托海
噶圖
爾干

巴勒喀什
淖爾

壁戈

庫魯
圖水

哈什
塔克
水

伊犁
河

南

